

Gwalarn

Niv. 160

KERZU 1943

GWALARN

Niv. 160

KERZU 1943

19^{vet} BLOAVEZH

ALI A BOUEZ

Pep niverenn Gwalarn a goust dimp bremañ war-dro 8 lur 50, hep kontañ hor mizoù-burev. Da lavarout eo, 12 niverenn a goust dimp 102 lur. Ret eo dimp goulenn hiviziken 100 lur ar bloaz digant hor c'houmananterion. Lakaat a reomp da 200 lur ar c'houmanantoù a enor, evit gallout kas un nebeut niverennoù evit netra d'al levraouegoù ha da dud re baour da baeañ.

TAOLENN

	PAJENN
<i>Kanaouennoù da Vivien</i> (Abeozen)	243
<i>Marv er Gêr</i> (F.-R. Meavenn)	249
<i>Etain hag Alill Anguba</i> (tr. K. Kongar)	260
<i>Un nebeut doareoù arouezius e brezhoneg</i> (Niederstenbruch)	265
<i>Ar gelennouriezh nevez</i> (A. Lainé, tr. P. Heussaff)	280
<i>Darempredoù etre Kernev-Veur ha Breizh</i> (G. Ar Pagan)	289
<i>Ar Roc'h-Derrien, II</i> (Roc'halan)	293
<i>An Trec'h</i>	302

Pep gwir miret strizh.

KANAOUENNOU DA VIVIEN

gant ABEOZEN

Notenn. — Ar barzhonegoù-mañ a zo bet savet evit tonioù iwerzhonat, kendoniet ha kempennet evit laz-seniñ gant Andreu VALLÉE. An tonioù I ha III a zo bet dastumet gant ar sonrezhour e-unan. An tonioù evit ar pezhioù II, IV, V ha VI a zo anezho niverennoù 39, I, 42 ha 15 eus un dastumadenn tonioù-pobl Iwerzhon gant JOYCE, *Ancient Irish Music*, embannet e 1855.

Talvezet o deus ar barzhonegoù-mañ d'un abadenn skignet gant Roazhon-Breizh d'ar 6 C'hwevrer 1943. Kanet oa ar c'hanaouennoù gant Yann DAHOUEZ ha Mona PESKER.

I

WAR-DU DOUAR AR YAOUANKIZ

*Pa fuilh miz Ebrel en hor c'halon
erc'h frondus avalenn ar garantez,
fur eo dimp soñjal, war-lerc'h ar bleunioù bresk,
e vo gwentet an deil gant an avel.*

— 243 —

An hent a dregern dindan hon treid.
Hor mouezh a bign sklaer en avel ar beure.
Dindan an oabl splann, e sklerijenn skedus,
bale ' reomp, sart, war-du ar pal kuzh.
Gout a reomp ervat : dorn rust an tonkadur
hon gloazo un deiz gant samm ar reuz.
Diboell eo, avat, ar re ù chom a-sav
gant aon rak an doan a zeuy un deiz.

Pa grazo Gouere gant e vannoù
an edoù fiñvus en douaroù sioul,
ez aimp da zistanañ hon izili skuizh
er stêr a voud e skeud an halegoù.

An hent a dregern dindan hon treid.
Hor mouezh a bign sklaer en avel ar beure,
Dindan an oabl splann, e sklerijenn skedus,
bale ' reomp, sart, war-du ar pal kuzh.
Gout a reomp ervat : dorn rust an tonkadur
hon gloazo, un deiz, gant samm ar reuz.
Diboell eo, avat, ar re a chom a-sav
gant aon rak an doan a zeuy un deiz.

Pa zeuio ar Goañv da skourjezañ
hon divjod gant avel lemm e c'hlae'har,
da zorn em hini, a va ene, kerzhomp,
ennomp spi pennek an Nevez-Amzer.

Er fank hag en dour, a gammedoù skuizh,
hent a raïmp, dispont, dindan ar c'hoabr izel.
Bouzar e chomimp ouzh galv an dizesper :
start ar c'halonoù na ziskredont ket.
Ar Goañv ' c'hell stignañ frim dindan hon treid
ha stardañ warnomp euzh e nozioù,
ar c'heuz ' zo ennomp d'an hañvoù bev ha splann
ouzh da galon klosoc'h am stardo.

II

DISKAR-AMZER

Moug an Diskar-Amzer war an derv a ziwade.
Flaminañ ' rae ar fav en heol o vont da guzh.
Deil skañv ar gwez pupli, ar glasten hag an onn
a strewe al letonenn gant o aour morlivet.

Er bodoù roz diwisk e vane speg rozennoù.
broñsoù, gwadek o liv, krizet en aer yenc'h
a zisliv glas an oabl. Diskar-Amzer a stroll
ur c'hinkladur roueel da zegemer ar Goañv.

Evel da ganmeuliñ ur serr-noz berr a lorc'h,
ul laz-seniñ du-hont, gant kouevrennoù an trec'h,
a skigne tonioù brezel, dianav d'ar vro-mañ.

Met, e traoñ al liorz, hor bezvenn ger ' zo noazh,
hag he bleñchoù krenus, stouet war-du an douar,
' zo e kañv eus an Hañv, flamminek en hon eñvor.

III

ROZENN MIZ DU

Ar rozenn a weñvo dindan anal miz Du,
hogen Mezheven splann ' zo c'hoazh bev en he frond,
dedennus ha tanav, ma trid ennañ fenozh
ene mezevennus an Hañv kaer aet da get.

Dit em eus degaset rozenn Gala-Goañv.
Selaou ouzh ar gentel a ro en ur vervel

*ar vleunienn gizidik, gwad ha goularz he liv,
a oar ez eo Ebrel bugel d'ar mizioù skorn.*

*Ifern an anoued, risklus d'ur galon vresk,
n'eo ken un harlu berr d'ar rozenn divarvel.
Ar reuziad ne bado nag e ankenioù lous.
Gweñviñ ' oar ar rozenn evit kaeroc'h genel.*

IV

EL LIORZH NOAZH

*Dibourc'het gant Kerzu e sae moug hag aour.
Hon huñvre en harlu, gant ar gwennilied,
etrezek Tir na n-Og, a-denn askell a sko
daveit an hañv hep goañv hag ar bleuñv divarvel.*

*An deil sec'h er vali, sklintin dre ma kerzhomp,
'zo 'vel ur pallenn-kañv. War an oabl marellet,
ar skourroù du rouestlet a stign kael ar gaoued
ma kan enni, pennek, ur voualc'h hec'h-unan-penn.*

*War al liorz krenus e plav 'vel un dudi.
En niplenn o leñvañ d'an eürioù kaer steuziet
e c'halv an evn gredus trec'h an heol alouber
a zegas d'ar vuhez an holl ebrelioù marvet.*

*Eveltañ leun a c'hred, daoust d'an oabl dislivet
a-us da zigenvez dic'hlasvez ar runioù,
gortozomp ma spego diweuz an heol yaouank
un añ madelezhuz war hon tal sederact.*

V

BREKILIEN

*Garlantez-hud an eürioù prim
a enaouas en hor selloù,
perlez doaniet pe wenvidik,
o skleurioù teñval pe lirzhin.
Kanet hon eus a-hed an hent,
d'an holl baradozioù kollet,
ar ganenn-hud a selaouer,
skignet eus ar bedoù berzet
d'an drouziwezh ha d'an arvar.*

*An anken eürus hon gwaskas,
n'heller pelloc'h he disoñjal,
ha n'hell genel en hon askre
nemet bennozha ha trugarez,
dindan daskren an daeloù glizh,
fennet gant kevrin an nozioù
war dal wenvidigezh garv
an devezhiadoù bestl ha mel,
bleunioù traonienn hor c'harantez.*

*Digor eo neved Brekilien
hepken d'ar c'halonoù gredus
a oar gedal war al lannegezh
ruzell ar beurevezhioù lemm,
mui tra enno oc'h enebiñ,
ouzh an dudi peurzirollet,
gloaz karadek, eurvad nec'het,
bepred efedus o breoù
er stivelloù hon dic'hoantas.*

AR FEUNTEUN-HUD

A-dreuz hentoù don ha lanneg divent,
 an tevenn displann hag ar c'hoadoù kuzh,
 d'hon ergerzhadenn hon eus klasket pell
 un herberc'h asur ha seven e beoc'h,
 ha n'hon eus kavet 'met anken voutin
 O klask hor breviñ gant javedoù dir,
 hogen striv pennek hon emzalc'h reudet
 a viras ouzhimp ar stokoù mezhus.

An droellenn-hud ma bev hon huñvre
 kloz a zo chomet ouzh al lammoù vil,
 mibien widreüs an arvar a grign
 gant e zent loudour ar c'halonoù faezh.
 Dalc'het hon eus glan, e don hon ene
 saour hor pokoù dec'h hag, a galon start,
 ergerzhet hon eus bevenn an islonk
 ha ribl ar froud du, leun a c'harmoù doan.

Gout a reomp ervat : enlouc'het e chom,
 evit ur biken, hor roudoù dister,
 en traezh disac'hus, war-nij gant ar gwent.
 Pep Ebrel yaouank o c'havo divoulc'h.
 War lez ar feunteun ma evomp enni
 disoñj treuzwelus hon tonkadur-don,
 kenvevet hon eus momedoù difin
 hag esmae berr ar galon beurbad.

MARV ER GÊR

Pezh-c'hoari gant Fant R. MEAVENN

TUD AR C'HOARI

LIZ — CHANN — ANTON

Emeur e ti un den-a-*vor* e Bro-Leon. Marv eo eizh deiz
 'zo. Emañ an intañvez, Liz, oc'h evañ kafe gant c'hoar
 an hini marv, Chann, a zo plac'h yaouank kozh, ha keme-
 nerez eus he micher. Emañ er sal bras en traoñ, e-touez
 an arbeuri eus ar vro hag an holl draoù a vro estren
 bet degaset gwechall gant an hini marv. A bep seurt ez
 eus, armoù dreist-holl, ha pennoù koad du renket ingal
 war ar mogerioù. An noz a zo deuet, koan a zo bet debret.
 Pell 'zo dija he deus lavaret Chann e rankfe mont d'he
 gwele, er gambr war lein.

CHANN. — Nann, Liz, amzer 'zo. N'ouzon ket
 ha ma 'z oc'h graet evel don c'hwi ivez. N'on bet
 morse evit komz eus traoù sirius goude koan.
 Chom a reont war va c'halon ha ne c'heller ket
 kousket goude se. N'oc'h ket skuizh, c'hwi?
 C'hoant am eus da vont da gousket, evit gwir...
 ya, vat, ur banne kafe ho pijs c'hoazh? Ne rank-
 fen ket sur... Ma vijen en ho lec'h, e stlapfen an
 holl bennoù du-se e-barzh an tan. Dañjerus int.

Dañjerus int, m'hel lavar deoc'h. Lavaret e vije o deus un dra bennak da lavaret.

LIZ. — N'int ket bev, Chann. Kemerit un tamm sukr. Petra o dije da lavaret ?

CHANN. — Evel m'o dije gwelet un dra bennak en ti-mañ.

LIZ. — Meur a dra o deus gwelet... Ho preur a naetae anezho bep gwener. Ha marv eo d'ur gwener ivez.

CHANN. — Ganet d'ur gwener, marv d'ur gwener. Pep hini, a gav din, en deus un devezh dezhañ e-unan e-giz-se... hag ez eus devezhioù a gasaan me, al lun, ar merc'her, n'ouzon perak. N'eus ket un devezh hag a zo deoc'h... Nann ? Souezhus e kavan ac'hanoc'h, Liz. Mestrez-skol oc'h chomet atav. Lavaret e vije emaoe'h e-touez tud hanter ziot hag hanter zrouk, evel bugale, ha neuze n'hoc'h eus fiziañs nemet ennoc'h... Sellit, sot on bet da gemer kafe ur wech all. Santout a ran va c'halon o piltrotat....

LIZ. — Skuizh ez oc'h, Chann. Labourat a rit un hanter re.

CHANN. — O, ne ran ket mui. Dres evel va breur e teuin da vezañ moarvat. Dec'h e selaouen ouzh va c'halon e-pad an noz. Mont a rae evel un treñ-patatez diviet. Ne gleven nemet en deñvalijenn, hag ar razhed...

Gwechall, Liz, en ti-mañ e oant dañserien dispar, ar razhed. Bremañ int labourerien. Ret e vije deoc'h kaout ur c'hazh pe kemer arsenik. N'hoc'h eus ket soñjet prenañ arsenik morse ?

LIZ. — Nann, sur, perak ?

CHANN. — Met evit ar razhed-se evel just.

LIZ. — Me 'm eus aon rak an holl loened.

CHANN. — E-giz ur gwir vestrez-skol, a lavaran deoc'h, e-giz ur plac'h savet e kêr... Atav ez eus bet razhed amañ. Karout a raen selaou outo, e-pad an noz. Soñjet em eus em bugaleaj, a zo bet ken hir, ken hir.

LIZ. — Ar bugaleaj a vez bepred re hir.

CHANN. — Marteze a-walc'h. Hag en ti-mañ e kreden klevet a-greiz-holl, hep soñjal, mouezh va mamm, mouezh va breur. Soñj hoc'h eus eus mouezh va mamm pa oa mezvez ?

LIZ. — Met, Chann...

CHANN. — Gouzout a ran. Ne oa ket ho mamm deoc'h. Ur vamm-gaer a c'hell ober n'eus forzh petra, ne c'hortozit nemet displijadur diouti. Marv eo avat, dre c'hras Doue. Marv eo va breur ivez... Ret eo da bep hini mervel, a drugarez Doue. Ha ne vije ket lavaret pa weler an holl ardoù a ra an dud war-lerc'h o zud marv. Daoust hag ez omp bet graet da badout ? Ma, petra ' fell deoc'h, ken iskis eo spered an den, ker pell diouzh ar wirionez, n'eus nemet gwelet ar gevier a zo er c'hrenn-lavarioù, ar re anezho n'int ket diot penn-da-benn, evel :

*Keuz a-raok pa n'eus ket,
Keuz war-lerc'h ne dalv ket.*

Pebezh sotoni... Ar marv da skouer, me a zo sur e teu deoc'h e-giz ar c'housked pe ur bugel, d'an diaesañ. Ne vije ket diaes lazhañ unan bennak pa ouzer petra eo ar marv e gwirionez.

LIZ. — Met, Chann...

CHANN. — Setu, n'eus ket tu da gaozeal. Gant gerioù e vezit kaset en tu all eus ho soñjoù. A sellit, me ' zo ' vont da gousket bremañ avat. Ul lev'r a gemerin evel dec'h da noz. Lenn e-barzh

va gwele, ha dijuniñ, ivez... A-wechoù, Liz, e savan d'ober va dijuniñ, hag ez an en-dro e-barzh va gwele da zebriñ. A, va Doue, setu plijadurioù ar plac'hed yaouank kozh...

LIZ. — Gellet ho piñe dimeziñ, Chann.

CHANN. — Un tammig muioc'h e vijen bet dimezet, va Doue. D'ar mare-se ne gerzhen mui war an douar ha ne sellen mui ouzh an horolaj. Ma, ma. Ken buan ha tra e vijen aet skuizh gantañ goude an eured, c'hwi 'oar penaos e vezen pa oan yaouank. Nann, ne ouzoc'h ket : heñvel e gan ouzh va breur. Gwelloc'h eo chom hoc'h-unan-penn p'emaoc'h e-giz-se, n'eo ket gwir ?

LIZ. — Ho preur a oa un den mat, Chann.

CHANN. — Ya 'ta, un den mat. Ne ouien ket petra e oa un den drouk a-raok ma vije deuet en-dro eus ar C'hreisteiz hennezh. N'ho poa nemet sellout outañ.

LIZ. — E zaoulagad...

CHANN. — Dres.

LIZ. — Met ne raen forzh, Chann. Diseblant oan deuet.

CHANN. — Truez am boa.

LIZ. — Ar vuhez a oa e-giz-se.

CHANN. — O, n'eo ket. Me 'm eus klasket evañ neuze evel va mamm. Met ne oan ket avañsetoc'h. Ar c'hontrol eo. Ker sklaer e teue diabarzh va fenn ma welen pep tra du war wenn, kalz gwashoc'h eget boas. Avañsetoc'h, avat. Ha c'hwi vije bet kemend-all evidoc'h. N'hoc'h eus ket ur penn da c'hellout evañ. Ur penn leun a basianted

hoc'h eus, penn unan en deus gortozet rummadoù bugale berrboell da respont goulennoù ar c'hatekiz, n'eo ket gwir ?

LIZ. — Marteze, avat. Me n'ouzon ket.

CHANN. — Leun a basianted da welet, kompren a rit, da welet. Ha dindan ez eus tan. Al levr tev-mañ a gemérin, mar plij deoc'h. N'it ket da gousket c'hwi ?

LIZ. — Nann, ket diouzhtu.

CHANN (*o sellet ouzh al levr*). — Daoust hag e vefe anv an den yaouank en deus leñvet da zeiz an interamant ?

LIZ. — Ya.

CHANN. — Perak en deus leñvet, Liz ? Met, penaos e c'hellfec'h gouzout ? Hag e c'heller leñvañ evit kement a abegoù. Gwechall e leñven bemnoz e-barzh va gwele. Tremén a ra, sur, met da gentañ oc'h tuet da grediñ ho pezo un dra bennak dic'hortoz dre forzh leñvañ. Petra 'ra ar paotr-se ?

LIZ. — Mestr-skol eo.

CHANN. — Hañ ! Mestr-skol. Hañ ! Hag e leñve. N'oa nemetañ o leñvañ.

LIZ. — Ya.

CHANN. — Ur paotr mat eo ?

LIZ. — Ya.

CHANN. — Ma, gwell a se. Mont a ran da gousket erfin ivez. Nozvezh vat, Liz.

LIZ. — Kouskit mat, Chann. Ma 'z, eus un dra bennak hag a vank deoc'h.

CHANN. — O, ya, diskenn a rin.

Liz a chom hec'h-unan-penn, difiñv, kollet en he soñjoù. Skeiñ a reer ouzh an nor ha kerkent goude e teu ar mestrskol e-barzh. Yaouank eo, bras ha kaeroc'h eget ne vez ar vistri-skol war ar maez, bev-tre da welet. E anv a zo Anton.

ANTON. — Evel just ez eus c'hwez ar c'hafe amañ. Petra a rafec'h hep kafe war un enezenn didud ?

LIZ. — Ya sur, azezit, petra ' rafen ? C'hwez ar vakañsoù a zo warnoc'h, ha liv an hañv.

ANTON. — Ar porpant nevez eo. Hag ul lizher am eus bet. Ne chomin ket pell fenozh. Deuet on da rentañ deoc'h ar re-mañ ha kemer reoù all mar plij. Hemañ, sellit, ne daly netra. Hemañ a zo gwelloc'h, nemet kalz re speredek. N'eus ket unan anezho a zo bet skrivet abalamour ne c'helle ket chom hep bezañ skrivet.

LIZ. — N'eus nemet al levrioù a gont evidoc'h. Kemerit ur banne kafe c'hwi ivez. Lavaret hoc'h eus ho poa bet ul lizher.

ANTON. — Ya.

LIZ. — Keloù mat ?

ANTON. — Ya.

LIZ. — Gwell a se.

ANTON. — N'eo ket al levrioù hepken a gont evidon.

LIZ. — Nann.

ANTON. — Laouen e oan, sur, p'em eus anavezet ho kwaz da gentañ da zont amañ da gerc'hat levrioù ha da gaozeal, ken alies ha bemnoz, a-

wechoù. Heñvel e oamp evit traoù ' zo, ne gav ket deoc'h ?

LIZ. — Ya, sur.

ANTON. — Lavaret e vije n'oc'h ket sur. Evel just ne oan ket un den eveltañ. N'em eus ket bevet, me. Gortozet em eus, en ur sellout ouzh an deiziadur. C'hwi 'oar, c'hwi a zo bet oc'h ober skol ivez. Ne reer nemet kontañ an devezhioù, hag o renkañ hag o direnkañ evit gouzout peur e vo graet ar genstrivadeg jediñ hag ar genstrivadeg istor. Pa selaouen outañ e soñjen : « Ma labourfen da dec'hout kuit, ma studifen bemnoz... » Netra nemet ar soñjoù-se dija a oa un tec'h. Hag ennoc'h e soñjen ivez, ya, gwir, penaos e seblante ar vuhez bezañ aes evidoc'h, evel m'ho pije bet ur c'hevren bennak d'ho sioulaat, d'ho laouenaat, ya, gwir..., sot eo ?

LIZ. — Ur c'hevren a oa. Ha yaouank ez oc'h.

ANTON. — Ne vin ket atav. Hag en ur soñjal ennoc'h e-giz-se... Ya, sot eo da lavaret marteze, soñjal a rañ : « Poent eo din dimeziñ, rak memes tra... »

LIZ. — Ya ?

ANTON. — Netra.

LIZ. — Peur emaoe'h o vont kuit ?

ANTON. — A-benn eizh deiz moarvat, n'ouzon ket c'hoazh, gortoz a ran unan bennak, dres.

LIZ. — Da zont amañ ?

ANTON. — Ya.

LIZ. — Amzer 'zo neuze, evel e lavare va c'hoar-gaer bremaik. Un dra am eus da lavaret deoc'h, diaes. Marteze e skrivin kentoc'h. Diaes eo, abalamour n'anavezit ket ac'hanon mat

ANTON. — Eo, avat. N'on ket fall da varn an dud. Ho kwaz, da skouer, diouzhtu em eus gwelet pebezh teñzor am boa kavet, ha penaos e kare ar vuhez dre natur ha n'eo ket evel tud ar vro-mañ, en ur c'hortoz un dra bennak da c'hoarvezout... Piv a zo o tiskenn ?

(Unan a zo klevet o tiskenn gant diri-diabarzh an ti.)

LIZ. — Va c'hoar-gaer eo. Ha setu unan n'ana-vezit tamm.

CHANN (a zeu e-barzh). — Ho tirenkañ a ran ho-taou ? Liz, ur werennad dour, mar plij, da lakaat va dent da drempañ evit an noz. C'hwila zo an hini en deus leñvet da zeiz an interamant, 'keta ? Azevit 'ta, arabat chom en ho sav dirazon. N'on nemet ur plac'h yaouank kozh. Ne vern pe-seurt gwerenn a raio, Liz, arabat deoc'h klask pelloc'h. Pebezh amzer vreïn evit ar miz, 'keta ? Liz, ne c'hellin mui kousket. Ma n'ho tirenkan ket, ur banne kafe am bo c'hoazh ? Azevit 'ta, den yaouank.

ANTON. — Poent bras eo din mont kuit.

LIZ. — Amzer hoc'h eus.

CHANN. — Amzer en deus, sur, azevit, azevit, me a chomo amañ. Perak oc'h aet da leñvañ e-pad an interamant ? An dra-se eo en deus lakaet ac'hanon da brederiañ...

LIZ. — Marteze ne ouzoc'h ket, Chann, e oa Anton mignon bras d'ho preur. Dont a rae amañ bemnoz, koulz lavaret.

CHANN. — Dres, mignon d'am breur. Ha neuze ne gomprenit ket nag an eil nag egile ? Ne ran forzh ebet ma 'z oc'h en em glevet ho-taou. Gwazh a se evitañ.

ANTON. — En em glevet d'ober petra ?

CHANN. — Va Doue benniget, dapulagad am eus. Gwazh a se evitañ. Eñ hag a grede abaoe pell ne vije ket marvet er gêr abalamour d'ur sorserez bennak a vro estren he doa prometet dezhañ e vije bet lazhet. Ha div wech a-raok kuitaat ar mor e oa bet hanter lazhet, ur wech e Chang-Hai hag ur wech en Haor-Nevez. Ha neuze e oa deuet da grediñ ne c'hellfe ket an Ankou tapout krog ennañ.

LIZ. — Selaouit, Chann...

CHANN. — Selaou petra ? N'emaoc'h ket o vont da lavaret din penaos e c'heller lazhañ un den a zo klañv e galon, gouzout a ran... Penaos eo marvet va mamm, a gav deoc'h ? Ho kwaz a ouie. Ha pa lavaran deoc'h e komprenan ac'hanoc'h ho-taou... Hemañ a zo ur paotr mat, Liz; unan a c'hell leñvañ; va Doue, n'eo ket ho kwaz ho pije gallet lakaat da leñvañ... Ha ma kav deoc'h ez in da lakaat brud fall war an ti-mañ... A-walc'h am eus bet gant va mamm pa 'z ae da zãnsal war blasenn an ti-kêr, mezv-dall. N'eo ket bremañ pa 'z on deuet sioul war an oad, ez in da lavaret dezho eo bet lazhet va breur gant e wreg, dre garantez ouzh ur mestr-skol hag a zo mat ha kaer, feiz....

ANTON. — Foll ez oc'h pe n'oc'h ket ? N'hoc'h eus ket a vezh ? (O treiñ war-du Liz). Penaos e c'hellit chom e-giz-se ? Lazhet dre garantez, c'hwila zo foll pe petra ?

CHANN. — Siuoloc'h, siuoloc'h, den yaouank. A-benn bloaz, e c'hellot dimeziñ ganti.

ANTON. — Met gant piv ?

CHANN. — Gant an intañvez.

LIZ. — Klevit, Anton, gwell e vije deoc'h mont

kuit. Rak bremañ c'hoazh ne da ket re fall an traoù ganti, met bremaik ne vo ket brav na da welet na da glevet. Alies eo bet e-giz-se. Alies he deus ijinet traoù spontusoc'h c'hoazh. Arabat ankounac'haat oc'h bet c'hwec'h miz e ti ar re foll e Montroulez, Chann. Kement-se...

CHANN. — Brav-tre, Liz, brav e gwirionez. Em em zifenn a rit. Kement-se a zo brav, kement-se a vije brav, ma ne vije...

LIZ. — Kasoni ouzhin hoc'h eus bet atav.

CHANN. — Arabat deoc'h klask kompren ac'hanon, paour kaezh Liz, ne c'hellfec'h ket. Marteze e karan ac'hanoc'h, piv 'oar, hag e komprenan ac'hanoc'h. Me n'am bije ket bevet eizh deiz gantañ.

ANTON. — Mont a ran kuit.

CHANN. — Amzer hoc'h eus. Petra hoc'h eus da lavaret ? Aon hoc'h eus bremañ ?

ANTON. — Razoc'h ?

CHANN. — O, ket. Aon da vezañ tapet a-gevret ganti p'ho pezo gouezet ar pezh am eus da ziskouez...

LIZ. — N'hoc'h eus netra.

ANTON. — N'em eus ket aon, hag un dra c'hoazh a lavarin a-raok mont kuit. Me 'zo 'vont da zimeziñ ar miz a zeu. Lavaret he deus ya, hag em eus bet al lizher hiziv. Sklaer eo ? Komprenet hoc'h eus ? Ma karc'h dont d'ar skol, Liz, ha n'eo ket chom gant ur follez. Lec'h a zo e ti ar rener hag e vije lavaret ez oc'h klañv pe un dra bennak e-giz-se. Ar plac'hed yaouank kozh, ya...

LIZ. — Kit kuit, Anton, mar plij. Chom a rin.

ANTON. — Me a c'hellfe chom ivez ; marteze, ganeoc'h.

LIZ. — Nann, avat, kit bremañ.

(Anton a ya kuit goustadik en ur saludiñ reut-tre Chann. Un dornad-fiziañs da Liz. Chom a ra an div vaouez o-unan. Ne lavaront tra e-pad ur pennad hir a-walc'h.)

CHANN. — Neuze ne ouie ket ?

LIZ. — Nann.

CHANN. — Ha n'ho poa morse diskouezet dezhañ... ho karantez ?

LIZ. — Nann.

CHANN. — Ha bremañ ez a da zimeziñ gant unan all.

LIZ. — Ya. Ar vuhez a zo e-giz-se.

CHANN. — O ! n'eo ket... Ha bremañ ne welin nemet egile, gant e zaoulagad, egile marv er gêr, da virviken...

(Kouezhañ a ra war he daoulin, ha leñvañ sioul.)

ETAIN HAG ALILL ANGUBA

Danevell iwerzhonek

lakaet e brezhoneg gant Kenan KONGAR

Eoc'hid Airem (*an Arer*) a zeuas da vezañ roue war Iwerzhon hag ar pemp rannvro a oa dindan e veli, roue pep hini anezho o vezañ en e wazonezh. Ar rouaned-se a oa neuze Konc'hobar mab Ness ha Mess Gegra ha Tigernac'h Tethbannac'h, ha Ku-Roi hag Alill mab Mata Muresk. Da Eoc'hid e oa kestell Din Fremann e Mide ha Din Fremann e Tethba. Ha muioc'h e plije dezhañ Fremann Tethba eget lez all ebet en Iwerzhon.

Kentañ bloaz ma oa bet anvet Eoc'hid da roue, e pedas tud Iwerzhon da zont da C'houel an Emvod e Temair en arbenn da ziazezañ ar c'har-goù hag an telloù evit pemp bloaz. Hag ur respont heñvel a zeuas dezhañ a-berzh an holl Iwerzhoniz : ne deurveze ket ganto dont d'an emvod e Temair e-ser ur roue hep rouanez, rak ne oa rouanez ebet gant Eoc'hid pa oa bet roet dezhañ ar veli.

Hag Eoc'hid ha kas neuze kannaded dre bep pempvedenn Iwerzhon d'glask evitañ ar vaouez pe ar plac'h kenedusañ a c'helle bezañ er vro ;

ha lavarout a reas ne vije gwreg dezhañ nemet unan ha n'he devije bet darempred gant gwaz ebet eus Iwerzhon en e raok. Ur seurt plac'h a voe kavet evitañ e-kichen Inver Kic'hmine, Etain merc'h Etar e oa. Hag Eoc'hid degas anezhi gantañ, rak bez' e oa tre dioutañ, ken dre he c'hened hag he neuz, ken dre he gouenn hag he sked, ken dre he yaouankiz hag he brud.

E dad Finn mab Finnlug en devoa bet tri mab digant ar rouanez : Eoc'hid Faidlec'h, Eoc'hid Airem hag Alill Anguba. E bodadenn Temair e kouezhas Alill Anguba e karantez Etain, hag hi bet dimezet gant Eoc'hid : ne ehane ket e selloù da barañ warni, hag ar selloù-se a oa arouez e orged. En em damall a rae Alill e-unan evit ar pezh edo oc'h ober, hep ma vije se un harp evitañ, rak trec'h e oa ar c'hoant war e c'halloud. Kouezhañ a reas-eñ klañv o vezañ ne felle ket dezhañ koll e enor, ha ne oa ket evit anzav ouzh ar vaouez.

P'edo ar marv dirazañ, e voe lakaet Fac'htna, mezeg Eoc'hid, da vont d'e welout. Hag hemañ a lavaras dezhañ : « Unan eus an daou gleñved a lazhañ an den ha ne deo ket ar vezegezh evit o fareañ, a rank bezañ krog ennout : poan garantez pe boan warizi. » Ne oa ket Alill evit anzav, avat, mezh m'en devoa.

E stad a varv e voe lezet e Fremann Tethba pa 'z eas Eoc'hid da ober un droiad dre Iwerzhon. Ober a reas da Etain chom er gêr evit ma raje al lidoù diwezhañ war-dro Alill : bez' e tlee toulañ e vez, derc'hel ar c'hañv ha lakaat lazhañ e loened.

*
*
*

Bemdez e teue Etain bremañ d'an ti m'edo Alill

astennet war e wele, evit komz gantañ, e doare ma torras war e gleñved. E-keit ma veze Etain eno ne rae nemet sellout outi.

Houmañ hen gwelas hag a brederias war an dra. Un deiz m'edont o-daou en ti e c'houlennas-hi outañ pe abeg a oa d'e gleñved.

« — Ar garantez evidout », a respontas Alill.

« — Un druez eo e vijes chomet keit all hep komz », emezi. « M'hor bije hepken hen gouezet e vijes bet pareet pell 'zo abaoe. »

« — Hiziv c'hoazh e parefen, mar kerez. »

« — Karan laouen », emezi.

* **

Bremañ e teue-hi bemdez d'e welout hag e kempenne dezhañ e benn, e priente dezhañ e voued, hag e skuilhe dour war e zaouarn. Teir gwech nav devezh hag e oa-eñ pare. Hag e lavaras da Etain :

« — Ar pezh a ra diouer din c'hoazh da vezañ peurbare, peur hen roi-te din ? »

« — Warc'hoazh ez po anezhañ », emezi ; « ne garfen ket avat e kouezhfe mezh war an aotrou en e di. Deus eta d'am c'haout warc'hoazh da c'houlou-deiz war an dorgenn a-zioc'h al lez. »

Dihun e chomas Alill e-pad an noz. Deuet mare an emgavadenn, avat, e kouskas ha ne zivorfilas nemet da drede eur an deiz.

Mont a reas Etain d'an emgav ha kejou eno gant un den a oa heñvel ouzh Alill da welout : klemm a rae zoken, gwan evel ma oa deuet da vezañ diwar-goust e gleñved. Ha hi ha komz dezhañ en doare a oa da blijout da Alill.

D'an trede eurvezh, Alill da zihunañ. Edo Etain o tont en ti hag eñ ha sellout tristik outi.

« — Petra a ra dit bezañ trist ? » emezi.

« — Em eus lakaet dit ul lec'h emgavout ha n'edon ket eno evit da zegemer. Trec'h eo bet ar c'houked din hag emañ o tont dres a zihuniñ. Re fraez e welan bremañ n'eo ket deuet ar yec'hed c'hoazh. »

« — Ne ra forzh », emezi, « dont a ra an eil devezh war-lerc'h egile. »

En nozvezh war-lerc'h adarre e chomas Alill dihun, un tantad mat a dan dirazañ ha dour en e gichen evit gwalc'hiñ e zaoulagad. D'ar mare divizet ez eas Etain d'an emgav ha gwelout eno an hevelep den, neuz Alill dezhañ. Pa zistroas d'ar gêr e kavas eno Alill o leñvañ.

Un trede gwech ez eas Etain d'al lec'h-emgavout ha ne oa ket Alill evit derc'hel d'e c'her. Adarre e oa eno an hevelep den.

« — N'eo ket ganez-te em eus lavaret en em gavout », emezi. « Piv out-te hag a zeu amañ d'am c'haout ? An den am eus lavaret dezhañ dont amañ, ne deo ket dre bec'hed pe wallc'hoant eo e teuan davetañ, hogen dre ma tere ouzh gwreg roue Iwerzhon e bareañ eus ar c'hleñved en deus gouzañvet. »

« — Dereout a rae gwelloc'h ouzhit dont d'am c'havout. Rak d'ar mare ma veze graet Etain Ec'hride, merc'h Alill ac'hanout, e oan-me da bried. Ker eo bet ar priz am eus roet evidout gant maeziou ha stêriou Iwerzhon, ha lezet da bouez en acour hag en arc'hant evit da gaout. »

« — Pe anv ac'h eus ? » a c'houlennas-hi.

« — Mider eus Bri Leith. »

« — Petra 'ta a zo bet ouzh hon disrannañ ? »

« — N'eo ket tenn : ardoù Fuamnac'h ha breoù
Bresal Edarlam. » Ha Midir a lavaras da Etain :
« Ha fellout a ra dit dont d'am heul ? »

« — Nann », emezi, « n'emaon ket o vont da
reiñ roue Iwerzhon evit un den ha na ouzon tra
eus e gerentiezh nag eus e ouenn. »

« — Me eo », eme v-Mider, « a lakaas ka-
rantez evidout e kalon Alill, ken ne deas e gig
hag e wad digantañ. Me eo ivez a lakaas pep
c'hoant orgedus da vont digantañ, e doare ma
n'en devije ket da enor da c'houzañv en abeg de-
zhañ. Daoust, avat, ha dont a ri ganin d'am bro,
m'hel lavar dit Eoc'hid e-unan ? »

« — Hag a rin ! » emezi.

Hag hi distreiñ d'an ti. « Kaer eo e c'hellfemp
en em gavout bremañ », eme Alill, « pa 'z on
pare, hep m'ez piije bet da c'houzañv ez enor. »

« — A zo mat evel-se », eme Etain.

**

D'ar mare-se e tistroas Eoc'hid eus e droiad ha
laouen e voe da welout e vreur bev-buhezek.
A-greiz kalon e trugarekaas Etain evit ar pezh he
devoa graet.

UN NEBEUT DOAREOU AROUEZIUS E BREZHONEG

gant NIEDERSTENBRUCH

Pa studier kudenn doareoù diouti hec'h-unan
ur yezh, e tleer he c'heñveriañ ouzh yezhoù arall.
Evit pezh a sell ouzh ar brezhoneg, ez eo ar
galleg hag ar saozneg dreist-holl a bourvezo dimp
peadra d'o feuranavezout. Pouezañ a ra an dis-
plegadenn-mañ kentoc'h war an ereadurezh hag
ar stumm-prezeg. Pezh a zastumer diwar evezhiañ
a laka anat er yezh vrezhonek nerzh galloudus,
fromadurezh anat-souezhus, ha poelladegezh dis-
pleget-mat.

I. — NERZH

An nerzh a vez lakaet anat e brezhoneg n'eo
ket anavezet kalz e galleg, tra ma kaver an doare
dibarel-se e saozneg, daoust ma ne denn an eil
yezh tamm ebet d'eben. Breizhiz a guitaas Bro-
Saoz pa voe aloubet ar vro-se gant ar Saozon.

Koulskoude ez eus ur gerentiezh bennak etrezo, a denn da ziskleriañ ar pleg-se en o yezhoù. Pezh a zo boutin etrezo eo gouenn hanternoz el ar pobloù a gomz yezhoù indezeuropek. An nerzh-se eo trospred heverkañ ar ouenn hanternoz el, gant he nec'hañs oberiataus, a vount an den etrezek pellerioù an ec'honder hag a redi anezhañ da oberiañ gant ur c'hreñvder didrec'hus.

Unan eus ar skouerioù anatañ dimp da ziskouez nerzh ar brezhoneg eo ar pouez-mouezh, a gouez peurliesañ war an eildiwezhañ silabenn, hag a-unan eo ar brezhoneg war se gant ar yezhoù keltiek all hag ar re c'hermanek.

Da vras e tenn ar *c'hreñvaat* e brezhoneg, e lies doare. Kreñvaat a reer dre rakverboù, a garer kement hag e saozneg hag e svedeg. Anavezet-mat eo ar c'hreñvaat dre « eta » e doare-prezeg ar werin : « Piv, eta, a veze dievezh alies ? » Dreist-holl en doare-gourc'hemenn : « Galvit Paol ha Per, eta ! » En hevelep doare, gant « aze » : « Piv a c'halvont aze ? » Dre « -se » e kreñvaer ar rakverb : « goude-se » e-lec'h « goude ». Karout a reer ivez pouezañ war ur ger, dre lakaat gerioù-diskouezañ e-lec'h ar ger-mell e-unan-penn : « an daol-se », « an dra-hont ». Doublañ ar raganvioù, o zridoublañ zoken, a c'hoarvez alies a-walc'h diouzh boaz ar rannyezhoù (GUILYSSE, *La Langue bretonne*, Kemper, 1936, p. 66) : « Va merenn-me a zo debret ivez pell 'zo ! » (merkañ amañ an tu-gouzañv) ; « e gambr-eñ ».

Karout a ra kalz Breizhiz pouezañ war an enebekaat : « Din-me eo an dra-se, n'eo ket ditte » ; « Mari a skrivo gant liv du, Anna hi a skriv gant kleiz gwenn ». Lakaat a reer ar raganv-gour, oc'h ober evel-se gant ar ger-rener div wech.

An doare kentañ-holl eo doublañ ur ger :

« mat-mat » (mat-tre), « gouzout a ouzon » (me 'oar ervat) ; e gavout a reer alies-kenañ e brezhoneg. En hevelep doare, dre c'hèrioù heñvelster : « dre nerzh ha labour » (war-bouez labourat nerzh), « trouz ha safar ar bed », (kemeret e GUILLEVIC ha LE GOFF, *Gramm. bret. du dial. de Vannes*, Gwened, 1931, p. 132). En *hendiadyoin-se* ec'h adkaver pezh a ra BEHAGEL anezho « Gesetz der steigenden Glieder » (J. F., 1909). Ur benn-reolenn eo a gaver e gresianeg, e latin, en alamaneg, e saozneg, gwech ebet e galleg, avat. Atav e vez an eil ger hiroc'h ha kreñvoc'h eget an hinj kentañ ; sellit ouzh ar skouerioù-se : ma ne dalv ket an nerzh el labour, ne dalv mann ; oberiusoc'h hag arvarusoc'h eo ar safar eget an trouz.

Bez' e kaver ivez un dro-greñvaat-dre-zoublañ e displegadur ar verb « kaout » : « me am eus levrioù » (levrioù a zo din-me). Dre « bout » ha stumm renet ar raganv-gour e troer « kaout ». Tostaat a c'hellfed ar frazennadur gallek « m'est avis » (ali on). Lusk a oa en indezeuropeg d'ur seurt boazadur ; en heniwerzhoneg hon eus « ni-m-tha » (n'em eus [ket]) hag e ruseg « ou menia kniga » (ganin [emañ] al levr). Div wech e vez displeget ar raganv-gour e frazennadurioù evel « me a gav din ».

Alies e kaver kreñvaat dre ziv araogenn ; unan eus an div a vez peurliesañ « da » pe « en » : « evit din-me », « mont war-du ennañ ».

Bez' ez eus e brezhoneg ur meni *phrasal verbs*, verboù hag a vez kreñvaet dre ur rakverb. Hogos dianav eo an troioù-lavar-se e galleg : « passez devant ! » (tremenit a-raok !), « jetez-le dehors » (taolit-eñ er-maez). Paot a-walc'h int e saozneg : « go on », « come back », e svedeg : « följa med », « komma ut », en alamaneg : « geh

weg », « komm her », e brezhoneg : « dont endro », « mont tre », « mont kuit », « mont war-raok », « mont diouzhoc'h », « chom a-sav ». War menoz al lusk pe an arsav e pouez ar rak-verb hag e kreñva ar verb evel-se.

Bez' ez eus c'hoazh doareoù all da greñvaat ar verb, avat, dre « bezañ », « ober », pe « bezañ + stumm-ober ar verb » : « bez' e vin dirak ar gwez-mañ » (bezañ e vin...). Bez' ez eus un nebeut troioù kenheñvel e galleg : « Sitôt le convoi arrêté, je fus l'embrasser et lui dire le cas qui m'amenait » (G. NIGOND, *Marie Montraudoigt*, Paris, Plon, 1938, p. 65 ; e Bro-Vande e c'hoarvez ar romant.)

E-lec'h ar verb end-eeun, « e lenn », e kavomp « lenn a ra ». E galleg kozh e kaver alies « je fais lire » (lenn a ran). Hiziv hon eus « faire de » : « il eût vite fait de grimper par derrière » (Alain FOURNIER, *Le Grand Meaulnes*, Paris, Emile-Paul, p. 198.). Da bouezañ war ar verb e reer gant troioù-lavar heñvelik e saozneg : « I do write ». Da vare an Azginivelezh e talvez e an dro-lavar-se « e skrivan » hep mui ken. E basneg e oa paot ar stummoù-se gwechall, n'int ket hiziv. (VAN EYS, *Kenyezhadur ar rannyezhoù basnek*, 1879, p. 266.)

An trede doare da bouezañ war ar verb eo hemañ : « emañ o lenn » ; e galleg kozh e lavared « je suis en lisant » ; hiziv e kaver : « nous étions à causer avec Delouche » (A. FOURNIER, *loc. cit.*, p. 267) ; pe, gant ar ger-mell : « Vous n'êtes pas encore au dormir ? » (DUPÉ, *La foire aux femmes*, Paris, Denoël, p. 230). Keñveriañ ivez : « Ce n'est pas choquant » ; an dro-lavar saoznek eo : « I am coming », ha basnek : « ethorten da », emañ o tont. Kavout a ra an dro-lavar diwezhañ-mañ e ziskleriadur e kengej tri zech a gaver er yezhoù germanek, romanek ha — gwelout ar basneg — ragindezeuropek.

(E meur o tanzen ur studiadenn a-ratozh war an troioù-lavar-se.)

Alies e vez implijet an tri doare-kreñvaat-se e brezhoneg, tra n'o c'haver nemet dibaot er galleg-bremañ.

Ar stummoù-prezeg diverb eo ivez a zo kreñvoc'h ha gourelloc'h. Gwell int d'ar vrezhonegion : « ur piled en e zorn » (o tougen ur piled...). (Gwened, p. 128). Ivez e stumm an anv-verb, a ya war un dro da ober ger-etre-bremañ, stumm-ober hag anv-verb, hag a saver aes diwar bep verb, evel e saozneg. Graet e vez gantañ evel gant un anv-kadarn. Dre e lies doare-implij eo e verra hag e kreñva ar stumm-prezeg. Vallée a lavar (*La langue bret. en 40 leçons*, St-Brieuc, 1932, p. 213) : « bez' e c'hell bezañ staget ceun-hag-eeun ouzh an anvioù-kadarn da verkañ pal, mennad : *kador-brezeg* (kador da ober prezegennoù), *bombezenn-entanañ* (b. evit lakaat an tan). Implijet paot eo an anv-verb evel doare-dezrevell : *hag eñ mont* (pe *da vont, ha mont, o vont*). « Goudé ar c'hentañ verb en doare-diskleriañ e c'hell bout lakaet e-lec'h an doare-diskleriañ : « Arzur a savas, ha mont ». Bez' e c'hell an anv-verb ober evit an doare-gourc'hemenn, direutoch : « ha mont bremañ an holl er-maez ! »

Lamet e vez ar verb alies, en e stumm-anv zoken : « un ti gwenn an talbenn anezhañ » (VALLÉE, p. 214), « deut eo hag eñ skuizh » (daoust dezhañ bezañ skuizh). Ne garer ket an troioù-lavar verbel : « on est merveilleusement consolé » a droer dre « bras eo hor c'honfortañ » (Gwened, p. 126). Evel-se e saozneg ivez. An troioù-lavar fetis a vez anataet ivez drezo nerzh ar yezh vrezhonek. Lakaet e vez alies-tre ur ger fetis e-lec'h un anv difetis, evel e saozneg. « Les paroles

d'indulgence » a zeu da vezañ « komzoù tud re vat » (*Gwened*, p. 122) ; « les relations sociales », « an hantiz etre an dud » (*id.*, 124).

Lamedigezh ar verboù-skoazell-doareañ hag ar gomz eeun a brou nerzhuster ar brezhoneg : « oblijet on » e-lec'h « je me vois obligé », « mar achap ganin » e-lec'h « ma lezan anezhañ da achap » (*Gwened*, 126-130).

E brezhoneg evel e saozneg e karer gwell ober gant ar stumm-gouzañv, kaletoc'h ha startoc'h : « sonet ez eus (a zo) » e-lec'h « on a sonné », « lennet eo bet al levr », « the book has been read », e-lec'h « on a lu le livre » (*VALLÉE*, 162, 166).

Stumm-emober ar verboù ne gaver e brezhoneg nemet en hevelep degouezhioù hag e saozneg : implijet e vezont hepken ma vez renet an ober a youl anat hag en un doare mennek etrezek ar sujed : « en em veuziñ » a zo « beuziñ a-ratozh-kaer ». A-hend-all e lamer ar raganv-emober : « sav ! », e saozneg « rise ! », e-lec'h « lève-toi ». Nepred ne vez implijet er stumm-gouzañv.

E yezhadurioù brezhonek skrivet e galleg e lenner alies, etre klochedoù, « (gant lusk) », « (hep lusk) ». Diflach eo an doare galleg da welout an traoù ha da vezañ, ha ne wel ket ar c'hallegerion a gemm etre ar fiñv hag an difiñv. Komzet ez eus bet eus ar *phrasal verbs*, a denn an evezh war an eil hag egile. *VALLÉE* (p. 20) a ro skouerioù anvioù-gwan o livañ un doare-stad, hag anvioù-gwan-verb o skeudenniñ al lusk etrezek an doare-stad-se : « dihun » (galleg « éveillé », saozneg « wake », alamaneg « wach »), ha « dihunet » (galleg « tiré du sommeil », saozneg « awaked », alamaneg « aufgewacht »); « marv » (« mort », « dead », « tot ») ha « marvet » (« mis à mort, de-

venu mort », « died », « gestorben »). E-keñver an araogetnoù e kaver an hevelep kemm : « ez an da Baris, mont a ran da gêr », hag « emañ e Paris, e kêr ». Seurt diforc'h a gaver c'hoazh er rakverboù : « aze, eno » (« là » hep lusk, « there », « dort »), « di » (« là » gant lusk, « thither », « dorthin »).

Amañ ne sellimp ouzh urzh ar gerioù nemet evit pezh a zo stumm-prezeg tenn ; ar stummañ a zisrann gerioù a vez unanet ez voas en ul lavar hepken : « pe evit tra » (Roparz HEMON, p. 36) ; ger evit ger e galleg « quelle pour chose » e-lec'h « pour quelle chose » ; « evit » a zo etrelakaet hag a zisrann « pe » diouzh « tra ». Pe c'hoazh ur goulenn dibabet e Roparz HEMON, *Méthode rapide de breton*, Brest, 1942, p. 56 : « pere e vije poent diskenn ? » Etre « pere » ha « diskenn » e vez etrelakaet « e vije poent ». Kregiñ a reer gant ur meizad, hep mont da benn ; goulenn a ra an derou un heuliad na roer ket diouzhtu ha na roer ket en e lec'h ; bez' e lakaer ar selaouer da c'hortoz, endra garfe anavezout sklaer ar frazenn a-bezh. An hini a gomz, evel an hini a selaou, a rank lakaat muioc'h a nerzh da sevel e lavarenn eget ma tibunfe an eil frazenn goude eben. Skouerioù all : « e pehini en deus va ene kemeret plijadur » (Matth. XII, 18), — « va ene » a lakaer etre div rann ar verb ; « dre hiv e kas ho pugale anezhe kuit » (Matth. XII, 27, — ar verb « kas kuit » a zo dastroc'het amañ ivez.

II. — FROMADUREZH

Anat eo e teu an nerzh a splanñ er yezh vrezhonek eus ar ouenn hanternoz el boutin etre an

holl bobloù indezeuropat. Hogen, divroet o deus ar Gelted, eus kreiz an Alamagn, etrezek kornog ha gwalarn, e-lec'h ma oa gouennoù arall. An Ao. POKORNY a reas dimp un taolennadur matre eus ar gouennoù rakkeltiek a veve e Breizh-Veur hag e Bro-C'hall (*Das nicht-indogermanische Substrat im Irischen*; « *Zeitschrift für keltische Philologie* », 1927, 16-t kaier) (1). Ne roimp amañ nemet un evezhiadenn bennak dre vras, o tiforc'hañ temz-spered ar re a veve e marevezh ar maen-benet diouzh hini ar re a veve e marevezh ar maen-lufret. Tud marevezh ar maen-benet o deus lezet en o c'hevioù livadurioù buhezek ha fromus-meurbet; en un doare eeun e vevent; ac'hano o blaz prim hag emyoulek evit al livioù, levezek ar vuhez, ar fetis hag an hewel. A-enep d'ar bevder diveizus-se, ez eo marevezh ar maen-lufret difetisoc'h; diazezet eo an arz anezhañ war al linennekaat hag ar prederiañ; tresañ a reont an drolinenn, ne livont ken; ar sklaerder, ar poell, an eeunded a zo arouez o zemz-spered.

Pa voe aloubet o douaroù gant ar Gelted, en em veskas ar re-mañ gant ar boblañs-se; en ur veskañ ganto, e tennjont diganto o yezh. Hogen kemmesk an div ouenn-se, ken disheñvel o speredegzh, ne voe graet nemet tammig-ha-tammig gant o zemz-spered indezeuropat-i, spered alouberion drec'h, taer ha kadarn, dreist-holl. Ha diwar ar peurvesk ec'h adkavomp an teir zro-spered evel arouezioù eus ar yezhoù keltiek.

Pa dec'has Breizhiz da Arvorig, e oad deut d'ar stad-se. E Breizh-Vihan e veskent gant ur boblañs na oa ket disheñvel-krenn diouto; ne oa nemet

(1) Sellout ivez Wolfgang Krause: *Die Keltén und ihre geistige Haltung*; Königsberg, 1935.

kemmoù bihan. D'an hevelep mare — er V^{me} kantved — e veske Angliz ha Saozon gant ar peurrest eus poblañs an Enez, pezh a voe abeg d'ur c'hemm evito ivez, diwelusoc'h avat, dre ma oant nebeutoc'h niverus. Ar c'hemm-se a gaver ivez amañ hag ahont, er yezh. Ma vez troioù boutin d'ar brezhoneg ha d'ar saozneg n'heller ket displegañ dre o c'herentiez indezeuropek, e tleer merzout enno kendanvez deut diwar herezh ar gouennoù ragistorel. Kollet eo yezhoù ar bobloù-se, hogen saveteet ez eus bet stummoù-prezeg ha doareoù-lavar er yezh deut war o lerc'h. Komz a reomp da gentañ eus ar fromadurezh.

Aes eo ar bevder-se da adkavout er stumm-prezeg. Direol-kenañ eo urzh ar gerioù, e-keñver ar galleg, dalc'het strizh gant lezennoù poellek. E brezhoneg e vez kentoc'h diouzh an hini a gomz ha diouzh e zoare-eñ da arvestiñ ouzh an traoù ha d'o diskleriañ. Bez' e c'hellfed sellout ouzh ar pleg-se eus ar yezhadur brezhonek evel herezh diwar an indezeuropeg, rak gouzout a reomp dre ar c'henyezhadur e oa direol-kaer urzh ar gerioù gwechall-gozh. Hogen ur c'hemm bras a zo. Taolomp pled ouzh ar stumm-prezeg tenn e latin: « Ante suos Niobe talamos... » (Ovidius); etre « suos » ha « talamos » eo bet lakaet « Niobe » hep droug ebet; rak diouzh an dibennoù-gerioù pinvidik-tre e weler pe c'herioù a glot kenetrezo. Kavet e vezont huan. Padal, e brezhoneg, dibaot eo an dibennoù-gerioù, ha rouez implij ar stumm-prezeg tenn. Ur menoz hepken a liv ar gerioù, ur strollad hepken a reont, na c'hell ket bout disrannet gant elfennoù n'int ket dezhañ. Distaget e vez ar stolloù-se en ur bomm, hag erect int alies dre gemmadurioù; hogen dieub-kaer eo ar brezhoneger d'o lakaat en ul lec'h pe lec'h er frazenn, gant ma vo lakaet ar verb er penn-kentañ

pe en eil plas er frazenn. (Sed aze un doare-ober keltiek-rik, ar verb er penp-kentañ, a gaver ivez en henspagnoleg, hag a zisklerier dre levezon yezhoù ragistorel.) Empenniñ a ra kement a venn lavarout e strolloù bihan ; pep from luziet a vez dispennet evel-se, ha distaget e vez ar rannoù hervez ar bevder anezho. Ar stumm-prezeg tenn en indezeuropeg a rog ar strolladoù gerioù, hag en tu-enep eo d'ar stumm brezhonek, m'emañ ennañ an eil stroll bihan war-lerc'h egile, pep unan anezho o lakaat da sevel ur « from bihan ».

En troioù-lavar-mañ da heul ez eus, e-kichen fromadurezh heverz, poelladegzh anat. Ar pezh a ziskouez ez eus alies plegennoù diwar div pe deir gouenn disheñvel o krouiñ, o wareziñ, o tisplegañ un dro-lavar dre zoareoù disheñvel hervez ar pleg hag an tech a lakaont en den. Ger-mell, anv hag anv-gwan a ya d'ober un unanenn strizh. Dre-se eo poellek ne vije stummet al liester nemet ur wech, en anv, ger-mell hag anv-gwan (hag an anv-gwan-verb ivez) o tremen hep liester na stumm gwregel, na vezont kavet nemet en anvioù; neblec'h ne gaver troioù-anvioù lies an indezeuropeg : « an oberourion vras », « les bons auteurs », « the good authors » : plegañ a ra ar saozneg d'an hevelep pennreolenn, hag an euska-reg ivez. Ar sklaerder poellek-se, avat, ne gaver ket bepred ken-ha-ken en holl strolladoù gerioù : bez' e c'hoarvez kemmadurioù disheñvel hervez ar reizh, hag ec'h anataont gwelloc'h unanded ar strollad. Goude ar ger-mell, e kemm lizherenn-gentañ an anvioù gwregel unan hag an anvioù-tud lies : « kador, ar gador », « tud, an dud » ; lakaat a ra an anvioù-se ivez da gemmañ lizherenn-gentañ an anvioù-gwan ouzh o heuliañ, dreist-holl ma tibenn an anvioù dre ur vogalenn pe l,

m, n, r : « ur gador gaer (kaer) », « ar vreudeur vat (mat) ».

Un hevelep ere strizh dre gemmadur a gaver en anvioù kevrennek : « un daol goad » (da lavarout eo un daol graet e koad). Evit an anvioù-gwan doareer, e kaver lod anezho stag ouzh un anv-kadarn kuit a c'her o verkañ ar c'hemblac'h etrezo (galleg « de ») evel e galleg « ses yeux couleur de châtaigne » : « ar plac'h he blev troc'het », « la fille ses cheveux coupés » ger-evit-ger. Ma 'z eus un anv-gwan eus ar ger a zeu war-lerc'h an anv-kadarn, e c'hell c'hoarvezout kemmadur : « ur stêr vras he genou ». Emañ ar rannig-diskouezañ war-lerc'h an anv-gwan a zeu goude an anv-kadarn : « an den fall-se ». E galleg ez eo ar strollad-gerioù un dra a bouez ivez ; ar stagadur, a c'heller damgeñveriañ gant ar c'hemm-madur, a ere darnoù ar strolladoù kenetrezo ; diouzh ar gerioù kevrennek a-vremañ e veizer n'eo ket ret atav lakaat un araogenn etre daou anv-kadarn : « siège cuir » e-lec'h « siège de cuir » ; diwar faltazi vev e sav an daou c'her oc'h ober ur menoz hepken. E basneg eo arouezius seurt strolladoù ; nemet ar ger diwezhañ eo a zoug an dibenn-ger a verk e ereadur er frazenn : « gizon onaren », ger-evit-ger « den-mat-an-eus », da lavarout eo « eus an den mat » (evel e galleg hag e brezhoneg a-hend-all), latin « viri boni », alamaneg « des guten Mannes » (latin 2 wech, alamaneg 3 gwech).

Evit an estrañjourion e sav alies diaesterioù diwar ar stumm-prezeg strollus-se, a dremen alies-tre hep elfennoù anat da verkañ an ereadurioù. Ober a reer gant ar rannig-verb « e » hag ar gerioù-nac'hañ « ne... ket » evit treiñ ar stagell c'hallek « que » : « me a wel ez eo skuizh Bleaz »

« je vois (que) B. est las », « me a wel n'eo ket skuizh B. » « je vois (que) B. n'est pas las » (VALLÉE, 183). Bez' ez eus daou strollad gerioù lakaet kichen-ha-kichen, « me a wel » hag « ez eo skuizh B. », evel e saozneg « I see B. is tired » ; koulskoude bez' ez eus amañ abegoù all evit emzispieg an doare-lavar-se, a gaver er yezhoù indezeuropek o-unan, keñveriañ an alamaneg : « Ich sehe, B. ist müde » ; e ruseg ivez, « tchto » a c'hell bezañ dioueret. Div skouer c'hoazh : « Hag ho Tad selestiel a oar hoc'h eus ezhomm eus an holl draoù-se » (Matth. VI, 32) ; « E gwirionez hel lavar an deoc'h, resev a reont o rekompans » (Matth. VI, 2). Ar c'hentañ strollad a vez klozet gant ar renadenn eeun, an eil strollad a ziskler ar renadenn-se. Boutin eo ar stumm-prezeg-se etre ar brezhoneg hag an heniwerzhoneg kenkoulz hag ar basneg.

Dav eo menegiñ amañ strolladoù « verb + anv », a gemer lec'h verboù eeun hag a laka muioc'h a fromusted el lavarenn : « dougen » pe « ober enor da » (e-lec'h « enoriñ »), « kannañ, ober ar c'houez », « en devout mezh, en devout joa ». Implijetoc'h c'hoazh eo seurt troioù-lavar en euskareg eget e brezhoneg pe e galleg : (Luc XV, 16) « desir zuen », brezhoneg « c'hoant en divije bet... »

Amañ e c'hellfed ober meneg ivez eus un dro-lavar bev-kenañ, d'an nebeutañ da zerou e implij. Evit loened 'zo, e vez spisaet ar reizh dre ober gant « tad » ha « mamm » lakaet dirak an anv : « un tad golvan » ; kavout a reer ivez ar rakger « tar- », deut hep mar eus « tarv » : « targazh » (Roparz HEMON, 20). « Penn » pe « loen », dirak un anv-stroll a ya ivez d'ober ur seurt unanderenn : « ur penn-deñved », « ul loen-kezeg »

(Roparz HEMON, 22). « Un tamm » hag « ur banne » a implijer evit treiñ ar galleg « un peu ».

Diwar fromadurezh ivez eo ec'h implijer kalz an anv-verb, o vezañ ma reer kement gant an anv e-lec'h ar verb : « emañ o lenn ». Pouezañ a ra ar spered hanternoz war an troioù-lavar gant anvioù dre ma 'z int kreñvoc'h ha birvidi-koc'h. Implijet e vez ivez e lavarennoù, dezho ur ger-rener disheñvel er bennlavarenn hag en islavarenn : « roit din ur bluenn vat, din da skrivañ aesoc'h a se » (VALLÉE, 212). Traoù peuzheñvel a gaver er rannyezhoù galleg : « Il lui a donné ce jouet pour elle s'amuser ».

Birvidigezh Vreizhiz a bouez kalz war an « emphasis » (c'hwezhañ al lavaradoù). Nerzh Hanternoziz hag ar virvidigezh-se a zo alies an hevelep tra pe dost. An *emphasis* eo a ren urzh ar gerioù alies. Stummoù lavarennoù-goulennata ha lavarennoù-estlammañ a implijer paot ; ur stumm dioutañ e-unan a vez d'an estlammañ : stagañ a reer « -t » da zerez-uhelañ an anv-gwan evit kaout an estlammañ : « gwanat den ! » pe « na gwanat den ! » pe c'hoazh « na gwanat un den ! » (Roparz HEMON, 30).

Ar rakverb, dreist-holl ar rakverb-doareañ, — a stummer dre stagañ un dibenn-ger pe ur rannig, warnañ liv an difetis, hag a zo stambouc'het un draig, — a vez lakaet en e lec'h anvioù-kadarn gant araogennoù, pe anvioù-gwan a from muioc'h (evel e saozneg dreist-holl) : « gant joa » e-lec'h « ez laouen », « derc'hel a reas leal d'e c'her » (Roparz HEMON, 67).

Dre an hevelep abeg « e verker an ereadurioù gant an araogennoù spisoc'h ha fraesoc'h eget e galleg (VALLÉE, 191) : « er sizhun a zeu », « da gentañ », hag all. Pokorny (*loc. cit.*) a zisklerias

e vez implijet ar raganv-perc'hennañ er yezhoù keltiek evel e saozneg un tamm mat aliesoc'h eget er yezhoù indezeuropek all, hag e vije se neuze ur boaz manet diwar ur yezh rak-keltiek : « lez c'hoazh *da* vantell gantañ » (Matth. V, 40), « laissez-lui encore *le* manteau » ; « ha likit dezhañ ur walenn war e viz hag ur botoù en e dreid » (Luc XV, 22) « et mettez-lui un anneau *au* doigt... », saozneg : « and put him a ring on *his* hand and shoes on *his* feet » ; hasneg : « bere eskura », war e zorn-eñ.

« Hini », « unan », « re », a ra evit an anvioù-kadarn evel « one » e saozneg (nemet evit an derez-uhelañ) : « an hini brav », « the fine one », « le beau », a ro ul liv hiniennel, ha personelezh, d'an anv-gwan, ha war un dro e roont skoazell d'an dud da ziforc'hañ etre an hini a reer « brav » anezhañ hag an nepreizh, ne vern pe dra vrav. Gant kenskoazell ar fromadurezh hag ar boelladegzh e saver seurt troioù-lavar.

III. — POELLADEGEZH

Pa geñverier ar brezhoneg ouzh ar yezhoù indezeuropek all, da skouer ar gresianeg, al latin, an alamaneg hag ar rusianeg, e vezer souezhet gant eeuned e yezhadur. Dre vezerezh poellek ez eo bet eeunet an direzhderioù ha lieselezh ar stummoù, hep m'he dije kollet ar yezh he gwevned hag he finvidigezh. N'eo ket ret he dije ur yezh meur a stumm d'an anv-gwan ha d'ar germell evit ar reizh hag an niver, na displegadur d'ar ger-mell, d'an anv ha d'an anv-gwan. En euskareg hag e saozneg e kaver an hevelep doareoù, da abeg dezho ar meizergezh poellek a oa

tra dibar pobladoù marevezh ar maen-lufret e kornog Europa. Ma 'z eus disheñvelderioù neuze, ez eo dre abegoù a hesoniezh (kemmadurioù), a redi d'ar fromadurezh.

E sell eus ar reizhveizezh, e vije lore'huskaer kemman ar raganv-emober hervez gour ha niver, evel e galleg ; e brezhoneg e kavomp hepken « en em » (e svedeg, e daneg, e norvegeg hag e slaveg e kaver an hevelep tra, a zisklerier hervez lezennoù ar yezhoù-se).

Dre an hevelep abegoù a vezerezh poellek e lakaer an unander goude an anvioù-niver : « ugent aval ». Re hir e vije pouezañ war an heñvelderioù etre ar brezhoneg hag ar rusianeg, a zisklerier dre o c'herentiezh indezeuropek.) Evel-se ez eus meur a raganv, lies o ster, a c'houl kaout war o lerc'h un anv en unander : « pet », « meur a », « kement », hag all.

Alies-tre ne glot ket ar verb gant e c'her-rener. « Pa vez diskleriet ar rener, e van ar verb en trede gour unan, ha pa ve ar rener-se ur raganv bennak, pe un anv lies : *mè a had, e preudeur a hadas.* » Koulskoude, er stumm-nac'h, e klot ar verb gant e rener... Er c'hontrol e lavarer, oc'h ober gant an trede gour unan : « n'emañ ket va c'hoarezed e kêr » (Roparz HEMON, 63).

Evit lakaat ur ger a-wel anat, ne gemm ket an dro-lavar : « me eo », « int-i eo », « it is they, ce sont eux ».

Frammadur ar frazenn-c'houennata n'eo ket disheñvel diouzh hini ar frazennoù all. Ma ne deus ger-gouenn ebet, e c'heller lakaat er penn-kentañ anezho « ha » pe « daoust ha », n'eo ket ret, avat. A-walc'h eo gant ar skiltr-mouezh, er yezh komzet, gant ar pik-gouenn er yezh skrivet.

Evel a weler, ez a pelloc'h ar boelladegzh e brezhoneg eget er yezhoù amezek.

AR GELENNOURIEZH NEVEZ

an doare ma vez lakaet
da dalvout e skolioù ar
Yaouankiz

gant A. LAINÉ

Lakaet e brezhoneg gant P. HEUSSAFF

FALL EO STAD AR OUIZIEGEZH

Fall eo stad ar Ouiziegezh, hiziv an deiz. Ken alies all e komzer a « Ouiziegezh » ma heller lavarout ez eo disteraet talvoudegezh ar ger-se. Gouiziek e vez kavet kement den dezhañ un tamm deskadurezh bennak. Bout gouiziek, avat, a zo dreist-holl kaout skiant-poell, bout gouest da varn ez reizh an traoù hag an dud. Tud ouiziek a seurt-se n'eus ket kalz. *Hen merzet e vez e kement dere eus ar c'hevredad* (1) : koulz e-touez ar skolidi hag ar studierien a glasker lakaat da

(1) Reishoc'h e kavan ober gant « kevredad » eget gant « kevredigezh ».

zastum ur bern anavezadurioù (2) didalvoud dezho en o buhez, koulz e-touez ar vicherourien hag a helle gwechall dont da gaout skiant-poell en ur labourat war o micher.

Ar maread fall, an enkadenn-se, he deus *neuzioù* disheñvel hervez renk an dud. Diouer a nerzh-kalon, a ijinegezh, a zo d'ar renerien. Ar werin a zo amoet hag a gemer kement tra moulet evel gwir bater. An holl a vev en diroll, ha n'o deus ken soñj eus an eil penn-deiz d'egile nemet gounit arc'hant ar muiañ hag ar buanañ ar gwellañ.

Petra 'zo *pennabeg* da gement-se ? Mont a ra ar skiant-vat, ar brederouriezh-natur, digant an dud, seul vui ma reer gant binvioù bruderezh mat da ziskiantañ (kelaouennoù, skingomz, fiñv-skeud...); neuze e lakaer evezh bras ma chomo ar c'holl-se evit ar rummadoù da zont, en ur zesevel ar vugale, er skol, hervez reolennoù faos.

Setu an hent a gemer *ar C'helennerzh kozh* : diskleriañ reolennoù difetis, aes da gompren evit bugale krenn-zonezonet, hag ober ganto da studiañ an traoù fetis.

Ur seurt kelennerzh ne ra forzh ebet gant natur ar bugel, a rank plegañ ouzh menozioù ar mestr-skol, peogwir emañ ar Ouiziegezh en e zalc'h. Graet e vez evel ma vefe an holl vugale speredet-heñvel, na mat na fall; evel ma vefent unan-hag-unan, pep hini gant un niverenn; ha kelenner e vezont evit ober paotred yaouank kozh. Difennet-krenn e vez labourat a-stroll. Ne roer

(2) An anavezadurioù a zo an holl draoù hag a anavez.

ket tu d'ar bugel d'oberiañ hervez e ijin. Displijus eo al labour ha ret eo diazezañ ar ren war gastizoù. E berr gomzoù, ne gaver dudi ebet gant personelezh ar bugel.

*
**

A-raok displegañ petra eo ar *C'helennerezh nevez*, eo ret lavarout war betra eo-eñ diazezet.

Dre vras ez eus pemp pazenn en anavezidigezh (1) an traoù : gouzañv, prenañ skiant, he mirout, barn, ober. Er striv-se e rank ar *c'horf*, ar galon, ar *spered*, kemer perzh.

Hervez an oad e weler an eil pe egile eus an tri ferzh-se trec'h war an daou all. A-bouez bras eo gouzout peseurt tech pe lusk (2) a zo ar c'hreñvañ d'ar mare-mañ-mare; e desav (3) ar skoliad eo dav dere'hef kont eus an dra-se.

Bevañ a zeu da gentañ, ha soñjal goude.

Betek 7 vloaz ez eur douget d'en em *vagañ* ha netra ken. Etre 7 ha 12 vloaz ec'h en em ziskouez an nerzh-korf; fich-difich e vezer bepred. Stad *korfel* a heller ober eus ar stad-se. Etre 12 ha 17 vloaz emeur en oad ar galon dener, an esmaeoù trumm; trawalc'h ez eo ar faltazi d'an dud a vez er stad-se, a raed stad *fromadus* anezhi.

Etre 17 hag 20 vloaz e fell d'an dud yaouank

(1) Anavezidigezh : an hent, al labour d'ober evit anavezout un dra bennak. Goude-se en deus an den « anaoudegezh » war an dra-se.

(2) An techoù a vez kemeret goude bozaman; al luskoù a zo en natur an den.

(3) « Desevel » a zo disheñvel diouzh « kelenn ». Pa zesaver unan bennak e klasker lakaat da greskiñ e gorf ha perzhioù e galon koulz ha perzhioù e spered.

seveniñ o zechoù gant muioc'h a wirionder. Re an eil reizh a glask darempredoù gant re ar reizh all : er stad *reizhel* emaint. Etre 20 ha 25 bloaz e teu tachenn ar faltazi da zisteraat dirak hini ar wirionded. Disteraat a ra perzh ar fromadoù dirak hini ar poell : ar stad *speredek* eo.

War-dro 30 vloaz e vezer deut da vestr warnañ an-unan hag e veizer ar gefridi d'ober er c'hevredad : ar stad *kevredel* eo. N'eus netra strizh er bevennoù a verker aze da bep stad. Tud a zo, ahendall, hag a chom a-hed o buhez en eil stad pe en egile : da skouer, ar re a zo dezho natur ar merc'hed pe an arzourien ne deont ket pelloc'h eget ar stad fromadus. Rouez, avat, ar baotred yaouank 20 vloaz degouezhet er stad kevredel.

DIOUZH DIV REOLENN VEUR E RA AR C'HELENNEREZH NEVEZ

1) Klask a ra lakaat kempouez, e talvoudegezh ar skoliad, etre galloudoù ar c'horf, re ar galon ha re, ar spered — kentoc'h eget lakaat anezhañ da verniñ en e benn anavezadurioù didalvoud.

2) An anavezadurioù ret a rank bezañ dastumet en ur vont eus ar fetis d'an difetis.

Hervez ar reolennt gentañ e ranker diwall personelezh ar bugel. Ma ranker he spisaat. Kemmñ a ra hervez ar VRO, an Oad hag an DERE er c'hevredad. Evit anavezout personelezh ar bugel (pe ar skoliad) e reer ARNODENNOU, a ziskouez peseurt techoù a zo dezhañ. Setu, da skouer, frouezh un arnodenn graet war grennarded 14-17 vloaz eus Paris :

Pariziz ma 'z int, ez int techet d'ober diouzh

o fenn o-unan ; n'o deus ket kalz a zoujañs evit ar reolennoù ; bepred e vezont drouklaouen ;

— N'int ket chalet kalz gant tu speredel an traoù ; troet a-walc'h int da vevañ en diroll.

— Lorc'hus int, pa n'o deus ket tu d'hen bezañ ; koulskoude ez int speredek, ha gouest da gaut un uhelvennad.

Krennarded' ma 'z int, o deus-int un temz-spered kemm-digemm, damheñvel ouzh hini ar merc'hed pe an arzourien (mont a reont gant ar c'hiz) ; en ur stad emaint ma n'hellont ket kas da wir kement tra a c'hellfent ober (barzet int gant mil digarez) ; n'o deus muzul ebet (mou-zhañ pe drelatañ a reont) ; garv eo dezho kement c'hwitadenn ; kriz ha kizidik int p'o deus ur veli bennak.

Disheñvel eo tro-spered an dud, hervez an *dere* a zo dezho er c'hevredad :

Ar *vicherourien*, hag a vev dastumet e bodoù, bepred o stourm ouzh ar savadurioù dinatur (mekanikoù, h. a.), a zo fromadus ha *qoñvik* (heñvel ouzh deñved).

Ar *gouerien*, hag a vev en digenzez, bepred o stourm ouzh an natur, a zo anezho prederourien, tuet d'ober diouzh o fenn o-unan. »

Diwar-se e welomp e vez graet labour fall pa vez ginet ar skoliad ouzh e vestr. Taolet evezh enta na ve mouget, na moustret, nag anoazet tra ennañ, dreist-holl evit kement a zeu diouzh an dere er c'hevredad. Arabat krediñ, koulskoude, e vez digoret hent d'an dirollegezh, en digarez-se. Hen gwelet e vo bremaik.

**

En eil reolenn e tisklerier e rank ar ouiziegezh bout gounezet en ur vont eus ar fetis d'an difetis.

Rak-se e vez kelennet en ur ober gant troioù micherel kentoc'h eget gant menozioù (da skouer, e reer gant boullouigoù da zeskiñ kontañ).

Evit luskañ ar bugel, e vrouder ennañ an ezhomm, ar c'hoant-gouzout, ar c'hoant-deskiñ.

N'eo mui dalc'het da strivañ e skeud e vestr, evel ur c'hrennad eus un den-deut. Mont ha dont a ra en ur bedig graet dioutañ, e-lec'h ma c'hell deskiñ penaos dont da zen. Gouarn ar bed-se, arvestiñ ouzh ar skolidi, ha lakaat anezho da dennañ kentel diouzh o oberoù, setu kefridi ar mestr.

**

Penaos e vez lakaet ar c'helennerezh-se da dalvout ?

E 1937 e voe kemmet ar reolennoù-kelemm er skol gentañ gall. E 1941 e reas Carcopino ur striv bras gant skolioù ar Yaouankiz. Ar rolloù-labour a zo diazezet war benndestenoù ; ar penndestenoù a zo rannet e kreizennoù-studi ; treiñ a ra ar c'helenn e-pad ar sizhun en-dro d'ur greizenn-studi.

An emvagañ (2 viz), an emwiskañ (1 miz)... a zo anezho penndestenoù hag a vez rannet d'o zro. An emwiskañ, da skouer, a zo rannet etre : Istor an Dilhad, ar Gwiadoù, an Oberiañ-Dilhad, an Dilhad dre ar bed, pezh a ra 4 c'hreizenn-studi.

E-pad sizhunvezh-studi ar gwiadoù e vo graet :

E studi ar Yezh ; geriadur ar gwiadoù ;

Er Skiantoù ha Douaroniezh : studi ar gwiadoù ;

Er Revell (1) : kudennoù a-zivout ar gwiadoù;
En Tresadur : tresañ anevaled hag a ro dan-
veziou gwiadus (deñved, preñved-seiz);

En Istor : Istor ar gwiadoù.

Ar ventoniezh, zoken, a heller kaout tro d'he
deskiñ dre ar c'helennerzh-se. Setu ar pezh a
rafemp e-pad mizvezh « an emwiskañ » :

D'ar 1-añ sizhunvezh : serzennoù (irienn ha kor-
denn);

D'an 2^{vet} sizhunvezh : kelc'h ha spinennoù (ar
c'harr-nezañ);

D'an 3^{vet} sizhunvezh : kompezenn ha mellenn
(gwiad-kevnid ha gronnenn ar preñv-seiz);

D'ar 4^{vet} sizhunvezh : eeunenn ha kompezenn
serz-ouzh-serz (gwrierez).

An doareoù-labour a glot gant ar c'helen-
nerzh-se : savet e vez ur fichenneg labour-skol.
War bep fichenn ez eus ur gudenn pe ur boella-
denn. Ur yoc'had fichennoù a zo evel-se etre
daouarn ar skolaer, hag ez eus warno kudennoù
eus kement seurt, strollet dre benndestenoù.

Hervez personelezh ar vugale e heller reiñ dezho
poelladennoù diaes pe ziaesoc'h : d'ober er gêr
e vint, holl war un dro (dindan ur pennad-amzer
divizet) pe unan-hag-unan. En doare-se e tesker
d'ar vugale kenurzhiañ o labour hag e weler per-
e anezho a zo dañvez renerien, merourien pe veve-
lien enno.

— Desket e vez d'ar vugale labourat a-stroll en
ur lakaat anezho da sevel ur fichenneg-diskleria-
durioù (a-zivout ar gloan, da skouer, e vo ur fi-
chenn), da zerc'hel al levraoueg e-ratre, da bin-

(1) Greomp gant « Revell » (kv. dezrevell) e-lec'h
« jediñ », ger gallek ha n'eo ket kalz anavezetoc'h.

vidikaat mirdi ar skol, da aozañ ur gelaouenn-
skol.

— Skol a vez graet e-ser pourmen. Ijinañ a
reer diduelloù gant pezhioù-c'hoari berr, ka-
naouennoù.

— Sevel a reer strolladoù-kenober (evit reiñ
skoazell d'ar vugale ezhommek, da skouer), hag
e lakaer ar vugale d'o ren hervez alioù ar mestr-
skol. 6 pe 7.000 anezho a zo e Bro-C'hall. Prientiñ
a reont ar vugale evit o c'hefridi e-barzh ar
c'hevredad, diwezhatoc'h.

**

Frouezh eus ar gwellañ a vez roet gant ar
c'helennerzh-se. Ar skolaerien a gav dudius o
labour, hag ar skolidi a zesk en-dro ar pezh a
vije bet dleet dezho deskiñ er skol gentañ.

Ar c'helennerzh-se, anat eo, a c'houlenn
muioc'h a striv a-berzh ar skolaer; gounit bras
a denn diwarnañ, avat.

Kelennerzh all ebet ne zere e skolioù ar
Yaouankiz. Ret eo treiñ kein a-grenn ouzh ar
skol gentañ : lakaat a rafe-hi ar skoliad da gaout
soñj eus devezhioù ken displijus, ma nac'hfe-eñ
ober e labour.

Ouzh krennarded 12-17 vloaz eo e tere ar c'he-
lennnerzh-se ar gwellañ.

KLOZADUR

Ar c'helennerzh nevez a zo en enep-kaer d'an
hini kozh :

— Derc'hel a ra kont eus personelezh ar skoliad;
an hini kozh a nac'he anezhi, hegas ma oa-hi
dezhañ.

— Dre ar c'helennerzh nevez e c'hell ar bersonelezh kreskiñ hag ober berzh : krouet e vez ur bed diouzh ment ar skoliad, a c'hell aze deskiñ dont da zen ; ar c'helennerzh kozh a glasse er c'hontrol mougañ ar bersonelezh.

— Diazezet eo ar c'helennerzh nevez war an doujañs ouzh an natur-den ; klask a ra lemel kement moustrevezh, ar pezh ne dalv ket da lavarout e ra-eñ brud evit an diroll hag an disenti-digezh.

Er c'hontrol, e-keñver an aezamant-diabarzh e tle bezañ ur c'harventez diavaez (en emzalc'h — reolennegezh ar soudarded), disheñvel hervez temz-spered ar skoliad.

Mont a reer a-enep meizad ar « pec'hed », ur meizad deut diwar ur gelennadurezh mat d'an holl, hag a fell dezhi kaout ar veli war gement den ha war gement tra. E-lec'h ar meizad-se e lakaer hini ar « red », da lavarout eo « e rank bout debret frouezh an ober ».

Anat pegen talvoudus eo ur seurt kemmadenn evit lakaat an dud da vout gouest da varn, evit diorren enno ar skiant-poell.

DAREMPREDOU ETRE KERNEV-VEUR HA BREIZH

gant Goulc'hen AR PAGAN

Bez' ez eus bet darempredoù a bep seurt etre Kernev-Veur ha Breizh abaoe donedigezh hon hendadoù er vro-mañ.

Darempredoù kenwerzhel da gentañ holl, a zeuas siwazh, da vezañ laosk a-walc'h war-lerc'h ar roue Herri VII a Vro-Saoz, da lavarout eo e fin ar XV^{vet} kantved. Darempredoù, ivez, etre tudjentil an div vro, hag eskemm zoken etre o friñsed, a badas betek fin ar XV^{vet} kantved. Ur brouenn eus an darempredoù-se a zo anezhi e danvez ar c'hontadennoù kernevek, bet dastumet e fin ar c'hantved diwezhañ, a zo lies gwech meneg enno eus porzh Rosgo, rann-vro Vontroulez hag he merdeidi. Ar c'hontadennoù-se, dreist-holl re eus a gornog Kernev-Veur (hag a zo kozh-tre moarvat), a gomz ivez eus paotred Vreizh-Izel a ya da fortunian da Gernev-Veur. Abegoù mat hon eus da grediñ na oa ket diouer kennebeut-all a zarempredoù speredel etre an div vro ; diaes eo, avat, lavarout

resis petra a oa anezho. Ar pezh a ouzomp ez eo e voe krouidigezh ur skolaj evit Kerneviz e Paris nozus e pep feur d'an darempredoù-se, dre ma sunas diouzhtu an darn vuiañ eus skolidi Gernev a felle dezho mont d'ar broioù tra-mor.

An darempredoù-se ne voent ket peurvouget evelato : ar Vretoned a zalc'has da vont da Gernev-Veur ha Kerneviz da Vreizh. Dielloù kozh parrezioù Kernev-Veur a ziskouez ez oa eus ar re stankañ niver ar Vretoned e Kernev-Veur e derou ar ^{XV}^{me} kantved. Ouzh o anvioù e veze peurliesañ staget ar meneg-mañ : « nati (pe natus) in partibus Britanniae sub obedientia Regis Francorum », da lavarout eo « bet ganet el lod a Vreizh a zo dindan Roue ar C'hallaoued ». E parrez Berian, pe Buryan (anezhi ur barrez vihan), da skouer, e oa pemzek « alien », pe estren e-keñver al lezenn. Bretoned an darn vuiañ anezho, evel m'hen gweler diouzh o anvioù ; e parrez Paule, bez' e oa daou estren warn-ugent, en o zouez tud a oa Udyn, Argall, Kerver, Trebyll o anvioù. tud gantañ hiniennoù eus an dielloù-se e Kernev-Veur en deus niveret 128 penn-den Breton* e parrez Penwilch war 723 a oa o vevañ enni e 1520 (1). Ar C'hernevad hag en deus pleustret kalz war dielloù e vro, an Ao. Taylor, a ro da anaout e voe dimezet betek seizh paotr a Vreizh e parrez Camborne etre ar bloavezhioù 1538 ha 1568. Estregeto, bez' e voe ivez, gouez dezhañ kalz a Vretoned all a voe dimezet er barrez-se d'an hevelep mare ; hogen ne voent ket roet evel Bretoned war

(1) Er *Revue Celtique*, n. 2, 1914, p. 294. Gwech e skriv Penwich, ha gwech all « Penwith ». Daoust hag ez eo stumm kozh ha stumm a-vremañ an anv-parrez-se, pe ur mank, ne ouzon ket.

an dielloù (an dra-se ne oa ket rekis, hervez). Doareoù-komz ar Vretoned n'int ket bet moarvat diefed war re Kerneviz, pa soñjer ez oa bev ar c'herneveg d'ar mare-se ha stank ar Vretoned, dreist-holl e kornog Kernev, e-lec'h ma oa ar yezh en he c'hreñvañ.

Diouzh an tu all, stank e oa ivez Kerneviz, e Breizh, dreist-holl e Bro-Leon. Kantvedoù goude krouidigezh ar skolaj evit Kerneviz e Paris e skriv ur Rener Breizh a-berzh Bro-C'hall ez oa e-leizh a baotred yaouank « saoz » e Montroulez o teskiñ brezhoneg : ret eo, a gredan, ober anezho paotred a Gernev-Veur. Dre ma oa kreñv-meurbet an enebiezh etre Bro-Saoz ha Bro-C'hall (un aotre da vont da studiañ brezhoneg e Bro-Leon a voe nac'het ouzh un den gouziek a Gernev-Veur, ur mailh war ar yezhoù keltiek eus ar ^{XVIII}^{me} kantved, gant un ofiser-poliñ a Vrest, a welas ennañ ur spier), seul dalvoudusoc'h a se eo donedigezh an dud yaouank-se da Vreizh.

Kentelius eo ivez, a-zivout an darempredoù-se, kelaouenn bemdeziek maer Penzanz, Richard Edmonds e anv, a zeuas gant eizh paotr yaouank da Gastell-Paol e 1818 evit o lakaat er skolaj. Reiñ a ra ouzhpenn da anaout ez oa bet skolieta maer Rosgo e Kernev-Veur. Digantañ eo en devoe an aotre da vont betek Brest, hag eno ne vank ket ar C'hernevad da verkañ e weler « war meur a stal ar gerioù brezhonek *Butun mat* skrivet e lizherennoù meur ».

D'an hevelep mare, ur C'hernevad all a notenn ez oa e Rosgo, pa zilestras eno, un den all a Vro-Gernev en doa anavezet e Penzanz.

Ur C'hernevad all, Boase, e anv, a embannas e 1865 *Ur veaj e Breizh*, n'eo ket displejus na digentelius da lenn d'an deiz a hiziv. Breizhiz ha

Kerneviz a oa boas d'en em zaremprediñ daoust d'an enebiezh a rene d'ar mare-se c'hoazh etre Saozon ha Gallaoued.

War-oro ar mare-se eo ivez e teraouas ar boda-degoù hollgeltiek a voe dalc'het meur a wech e Breizh, enno atav ur guchenn a Gerneviz a felle dezho diskouez na oa ket distanet elfenn an eñvor en tu all eus Mor-Breizh, mar doa aet du-se, siwazh, ar yezh da goll.

(Displeget e Roazhon-Breizh e-pad Kardeur ar Framm Keltiek d'an 11 C'hwevrer 1943.)

AR ROC'H-DERRIEN

11

Gerioù Dastumet gant N. Kelien
ha moulet e 1885

<i>Abostol (an daouzek)</i>	kreisteiz
<i>Amar-loer</i>	kordenn-grougan
<i>Ambrellin</i>	mab; bugel
<i>Amprefan</i>	lamprezenn
<i>Anjez</i>	tad
<i>Bimbiñ</i>	avalou-douar
<i>Batimañcho</i>	hotoù-koad
<i>Beek</i>	bleiz
<i>Beoz</i>	kuit (mont)
<i>Bich</i>	diaoul
<i>Bicheganego</i>	avalou-douar bihan
<i>Bie</i>	bier; dour
<i>Bilheoz</i>	arc'hant
<i>Bilhez</i>	plac'h
<i>Bos</i>	brav
<i>Boubouar</i>	ejen; bevin
<i>Boubouerien</i>	ardivink-dornañ
<i>Brif</i>	bara
<i>Bruant</i>	kilhog; vi
<i>Bruantez</i>	yar
<i>Kacuanenn</i>	keben
<i>Karved</i>	toull-bac'h
<i>Kelien</i>	bugale; tud
<i>Kerc'h-manac'h</i>	pebr
<i>Kerneo</i>	bro-ouez

<i>Kiger</i>	mezeg
<i>Klang(our)</i>	genou
<i>Kokanan</i>	lous
<i>Kornik</i>	diaoul
<i>Kotisañ</i>	kannañ
<i>Krank</i>	gwer
<i>Krib (Jezuz)</i>	archer
<i>Kubik</i>	diaoul
<i>Dankier</i>	keben
<i>Diholotañ</i>	kannañ
<i>Difoarañ</i>	paeañ
<i>Dornañ</i>	mezviñ
<i>Dorner</i>	mezvier
<i>Dovergn</i>	marc'h
<i>Dunig</i>	oferenn
<i>Eltrisañ</i>	klask bara
<i>Eltriz</i>	bara
<i>Erlekin</i>	gleure'h
<i>Ervoanik Plouilio</i>	ankou
<i>Fardach</i>	tud dister
<i>Feusañ, fleukañ</i>	ober bugale
<i>Fiqez</i>	kaoc'h-kezeg
<i>Flit(ouar)</i>	gwele
<i>Flu</i>	taolioù
<i>Flumañ</i>	kannañ
<i>Freouz</i>	kaoc'h
<i>Gamelad</i>	skudellad
<i>Goje</i>	ya, mat
<i>Gourd</i>	mat
<i>Gourdajo</i>	boued
<i>Grallik (ober)</i>	kousket
<i>Granig</i>	naon
<i>Grefier</i>	kazh
<i>Grifon</i>	ki
<i>Groegon</i>	kaoc'h-kezeg
<i>Grun</i>	groñj
<i>Gwammel</i>	gwreg; mamm
<i>Gwilhoig</i>	bleiz
<i>Heol ar blei</i>	a] loar
<i>Choufretéz</i>	alumetez
<i>C'houez</i>	ti

<i>C'houil</i>	labour
<i>C'houilañ</i>	labourat (ober bugale)
<i>C'houistañ</i>	labourat start
<i>C'housañ</i>	debrñ
<i>C'housach</i>	boued
<i>Iann al lorans</i>	genaoueg
<i>Iennañ</i>	touellañ
<i>Ienner</i>	toueller
<i>Ioulc'h</i>	keben
<i>Ioulc'hañ</i>	bevañ fall
<i>Italian</i>	rom
<i>Izabel</i>	gwin-ardant
<i>Jes</i>	unan bennak
<i>Ma jes — az ches</i>	me — te
<i>E jes — hon jes</i>	eñ — ni
<i>Ho ches — o jes</i>	c'hwi — int
<i>Hi jes</i>	hi
<i>Lagad-ijen</i>	pezh ugent real
<i>Lanteoz</i>	amanenn
<i>Laouen</i>	avat (ya laouen)
<i>Lardañ</i>	kannañ
<i>Laten</i>	teod
<i>Latenniñ</i>	fistilhañ
<i>Letern</i>	lagad
<i>Letez</i>	krapouezh
<i>Letezen</i>	genaoueg
<i>Loa vihan</i>	kafe
<i>Loko</i>	gwin-ardant
<i>Louanek</i>	gwin-ardant
<i>Louiza</i>	dour; hilienn
<i>Lugnañ</i>	sellout pizh
<i>Madelen</i>	holen
<i>Manego</i>	kefiou-dorn
<i>Marc'h-du</i>	treñ
<i>Mari-Robin (bugale)</i>	archerion
<i>Minik</i>	bihan
<i>Minson</i>	fall
<i>Minsoner</i>	pizh
<i>Moris (ober)</i>	netra (ober)
<i>Morse</i>	bara heiz

<i>Mouchouar-godei</i>	pistolenn
<i>Nikol boubouar</i>	kig bevin
<i>Nikol kleuz</i>	kig labous-yar
<i>Nikol turgn</i>	kig pemoc'h
<i>Noter</i>	noz
<i>Nouet</i>	mezv-mik
<i>Ostant</i>	tieg; unan bennak
<i>Otro</i>	pemoc'h; perc'h
<i>Pampey</i>	koueriad
<i>Pagnotenn</i>	keben
<i>Peilha</i>	lous
<i>Perier</i>	penn a-dreñv
<i>Pikolo</i>	arc'hant
<i>Pifo</i>	treid
<i>Pipi-du</i>	kafe
<i>Pipio</i>	laou pafajek
<i>Pistaon</i>	arc'hant
<i>Poins</i>	laeroñsi
<i>Poinsañ</i>	laerezh
<i>Poinser</i>	laer
<i>Polig</i>	kazh; noter
<i>Populo</i>	korn-butun
<i>Potred an taouen</i>	pesketaerion moru
<i>Potred an tok-tok</i>	toerion
<i>Puloc'h</i>	kannañ; labourat
<i>Raton</i>	beleg
<i>Reiñ kerc'h</i>	kannañ
<i>Rufan</i>	tan
<i>Rup</i>	pinvidig
<i>Skas</i>	laeroñsi
<i>Skaser</i>	laer
<i>Sifernet</i>	mezv
<i>Stoubinenn</i>	keben
<i>Sunañ</i>	klask aluzon
<i>Tafa</i>	chopinad
<i>Talar</i>	pred
<i>Taleriñ</i>	debrñ
<i>Taouen</i>	klasker bara
<i>Taouen</i>	laou, mcru
<i>Tariek</i>	gwerzh-butun
<i>Tok-tok</i>	morzhol

<i>Tortañ</i>	kousket; lazhañ
<i>Toto</i>	bedell
<i>Transailh</i>	moneiz
<i>Treo-torret</i>	gwestell
<i>Troez</i>	yod
<i>Trotach</i>	soubenn
<i>Tual(ig)</i>	louarn
<i>Tunodiñ</i>	komz luc'hach ar Roc'h
<i>Tunodo</i>	divizoù Rqc'hiz
<i>Uonig</i>	heol
<i>Vilach</i>	ar Roc'h
<i>Vitam</i>	gwin-ardant
<i>Water</i>	dour
<i>Wateriñ</i>	staofañ
<i>Zer (asined)</i>	avaloù
<i>Zousilh</i>	died
<i>Zousilhaden</i>	gwerennad
<i>Zousilher</i>	mezvier
<i>Zousilh-hir</i>	sistr
<i>Zousilh-tano</i>	gwin-ardant

Pennad moulet war levr N. Kelien.

UN DIVIZ WAR AN DOENN

— <i>Tremenet é ann daouzeg abostol ?</i>	— Ha sonet eo kreisteiz ?
— <i>Minson !</i>	— Nann !
— <i>Gourd é ober grallik pa ve et ann ostand ar c'houez.</i>	— Brav eo diskuizhañ pa vez ar perc'henn en ti.
— <i>Kelien ! ann ambrellin é !</i>	— Tud !... ar mab eo.
— <i>Minson oc'h da lugna. Eun daouen é, deuz ar vilach. — Uonik zo tomm; gourd é d'ann taounenn mont war ar beoz.</i>	— Fall oc'h da c'hedal ! Ur glaskerez bara eo eus ar Roc'h. — An heol a zo tomm; brav eo d'ar glo-c'herion mont war ar maez.

— Gourtoc'h da botred
ann tok-tok ober Moris ;
minson vo an tariek.

— Goje, med ho ches a
zo 'vel eur rup; bea oc'h
eus eur choufrezenn 'wit
ma fopulo ?

— Minson !... rufan zo
'barz ar c'houez. Bos ! lu-
gned ar wammel hag hi 'n
eus lakat ann erlekin war
he dron.

— Letez a vo 'ta d'ann
talar bihan ? ma jes a
chomo neuze da dunodi.

— Goje !

— Bravoc'h d'an doe-
rion ober netra; fall e vo
ar gwerzh-butun.

— Ya, met c'hwi a zo
evel un den pinvidik; ha
bez' hoc'h eus un alume-
tezenn evit va c'horn

— Nann !... tan a zo
en ti. Brav ! sellit hag he
deus lakaet an Itron ar
gleure'h war an trebez.

— Krampouezh a vo
eta d'an adlein ? me a
chomo neuze da gaozeal.

— Ya !

GERIOU NEVEZ

Bechek	avalou-douar
Bilienn	boutailh
Bla	eur
Bleoenn	banne
Bouloñjer	eurier
Brañk	gwenneg
Britio	bragoù
Budez	boutailh
Chargign	kof
Cheïn	roued
Chetig	c'hoari
Choflez	pri-raz
Dandeller	luguder
Dandelliñ	straniñ
Déz	nann
Didortañ	dihuniñ
Difoariñ	diskuliañ
Druilho	pilhoù
Greffañ	aozañ un doenn
Jalez	laezh

Kantouilhenn
Kramponiñ
Lamp
Lap
Luqnerato
Lukenn
Miroll
Pabienn
Paludenn
Paludenner
Palanko
Pesked
Picher
Piffo
Pitartit
Roleid
Rufan
Rufanediñ
Skas
Skaso
Skoïns
Spek
Tallenn
Tannaid
Tarbara
Tariadenn
Tezenn
Tubeil
Mastrouilh

keben
aozañ un doenn
minutenn
konikl
daoulagad
fri
goañv
maen-skient
toenn
toenner
treid bras
arc'hant
penn
bizied
yar
morzhol toenner
koad
klask koad
dle
divc'har
a-dreuz
drouk
taol
gwin-ardant
mous
sigaretezenn
bourd
dube
matezh

Un nebeut gerioù all a zo c'hoazh, a-dra-sur. Un
enklask pizh a vefe ret ober evit o dizoleiñ.

KOMZOU KLEVET ER ROC'H

Bimbiñ ' zo eun talar Avalou-douar a zo ur pred
miñson. tanav.

Mont beoz da Gerneo. Mont war ar maez.
 Eur vilhez gourd eus ar Ur plac'h kaer eus ar
 villach. Roc'h.
 Da glangour ! kelien mi- Serr da c'henou ! bugale
 nik ' zo. a zo.
 Mont a ran d'am flitour. Mont a ran d'am gwele.
 Mat é ar c'housaj ? — Ha mat eo ar boued ? —
 Miñson. Nann.
 Ma jes an eus granig. Me am eus naon.
 Hemañ é Yann al Lorans; Hemañ a zo genaouek;
 iennet e vez alies. touellet e vez alies.
 Ho ches a zo letezen. C'hwí a zo diot.
 Laka lanteoz war an el- Laka amanenn war ar
 triz. bara.
 Eur banac'h loko en o Ha bez' ho po ur banne
 pipi ? — Goje; pe ur gwin-ardant en ho kafe?
 banac'h izabel. — Ya; pe ur banne
 rom.
 Emañ ar raton er c'houez Ar beleg a zo en iliz.
 Doue.
 Mont a rez d'an dunig ? Mont a rez d'an oferenn ?
 Ho ches a zo poiñser. C'hwí a zo laer.
 E jes ac'h a da rufanedñ. Eñ a ya da glask koad.
 Sifernet é Yann gant zou- Mezv eo Yann gant sistr.
 silh hir.
 Hirie ' zo talar gourd : Hiziv a zo ur pred mat :
 kig bruant. kig labous-yar.
 An ostant ne ra ket tariek. Ar perc'henn ne ra ket
 gwerzh-butun.
 Gourd é trotaj ar wammel. Mat eo soubenn ar wreg.
 Eur vleoenenn az po ? — Ur banne ho po ? — Ya.
 Goje.
 Pet bla é bremañ ? — Nao Pet eur eo bremañ ? —
 bla hag ugent lamp. Nav eur hag ugent mu-
 nud.
 Emañ ar paludenner o Emañ an toer oc'h aozañ
 kramponñ gant pabien- un doenn gant mein-
 no kozh. sklent kozh.

Pesked a vo . — Neubet; Arc'hant a vo ? — Nebeut;
 miñson é an tariek; jes fall eo ar gwerzh-butun;
 an anjez a zo spek; di- an tad a zo drouk; dis-
 foar deañ. kleri dezhañ.
 Ro un dariadenn din. — Ro ur sigaretezenn din. —
 Rufan an eus ho ches ? Tan hoc'h eus ? — Ya.
 — Goje.

AN TREC'H

Stad an arnodenn e-pad c'hwec'h miz kentañ 1943

Kendalc'het o deus arnodennoù an Trec'h da vezañ dalc'het reizh e-pad ar c'hwec'h miz-se. Pemp arnodenn a zo bet dalc'het, koulz evit an Trec'h Meur hag evit an Trec'h Kentañ : div wech e Roazhon, div wech e Paris hag ur wech e Naoned. N'eus bet arnodenn ebet e Breizh-Izel !

TREC'H MEUR

Unnek den o devoa lakaet o anv evit tremen (1941 : 8; 1942 : 12). Holl int bet kavet barrek da c'hounit (1941 : 6; 1942 : 10). Setu anvioù an Drec'hourien nevez :

A zo bet degemeret gant ar meneg « mat-tre » ha graet dezho meuleudi ar varnerien :

An Ao.Ao. Yann Piette (Roazhon, 27-6) ; Andrev Guilcher (Naoned, 4-4).

A zo bet degemeret ivez gant ar meneg « mat-tre » :

An Ao. Jos Youinou (Roazhon, 27-6).

A zo bet degemeret gant ar meneg « mat » :

An Ao.Ao. Andrev Latimier (Paris, 20-6) ; Paol-A. Philippon (Paris, 20-6) ; Youenn Olier (Roazhon, 6-2) ; Gweltaz Bernier (Roazhon, 27-6).

A zo bet degemeret gant ar meneg « mat a-walc'h » :

An Ao.Ao. Andrev Geffroy (Roazhon, 22-6) ; Jul Conan (Paris, 20-6) ; Alfred Goasdoue (Paris, 20-6).

A zo bet degemeret c'hoazh :

An Ao. Charlez Kalenneg (Paris, 31-1).

War an unnek den o deus gounezet an Trec'h Meur e oa seizh hag o devoa gounezet an Trec'h Kentañ en araoek.

TREC'H KENTAN

Daou zen ha tregont o devoa lakaet o anv evit tremen (1941 : 33; 1942 : 35). Tregont a zo bet degemeret (1941 : 25; 1942 : 26). Setu anvioù an Drec'hourien nevez :

A zo bet degemeret gant ar meneg « mat-tre » ha graet dezho meuleudi ar varnerien :

An Ao.Ao. Erwan Tangi (Roazhon, 18-2) ; Per Geraud (Paris, 20-6).

A zo bet degemeret ivez gant ar meneg « mat-tre » :

An Ao.Ao. Andrev Latimier (Paris, 31-1) ; Per Roy (Roazhon, 27-6) ; Gweltaz Bernier (Roazhon, 18-2) ; Emmanuel Delahaye (Naoned, 4-4) ; Pol ar Gourriereg (Roazhon, 27-6).

An Dim. Mari Kemener (Paris, 31-1).

A zo bet degemeret gant ar meneg « mat » :

An Ao.Ao. Fred Moyse (Naoned, 4-4) ; Loeiz Feutren (Roazhon, 23-6) ; Herri Ar Floc'h (Naoned, 4-4) ; Guy de la Jaille (Paris, 31-1) ; Roparz Samzun (Paris, 20-6) ; Rojer Baron (Paris, 20-6) ; Rene Chalm (Paris, 20-6) ; Youenn Mokaer (Paris, 31-1).

An Itr. Gwilcher (Naoned, 4-4); Janed Ar Moal (Naoned, 4-4).

An Dim. Paola Grandhomme (Paris, 31-1); Yvette Pochat (Roazhon, 27-6).

A zo bet degemeret gant ar meneg « mat a-walc'h » :

An Ao.Ao. Yann Tymen (Roazhon, 27-6); Yann Chanteau (Roazhon, 30-6); Herve Boterf (Naoned, 4-4).

An Dim. Marc'harid Riou (Paris, 31-1).

A zo bet degemeret c'hoazh :

An Ao.Ao. Leon Toulemont (Paris, 20-6); Aleksandr Russon (Naoned, 4-4); Roparz Barre (Paris, 20-6); Andrev Bihan (Paris, 20-6); Loeiz Gervennou (Roazhon, 30-6).

An Dim. Nouela Ollivier (Roazhon, 27-6).

G W A L A R N

KELAOUENN VIZIEK
KANNAD FRAMM KELTIEK BREIZH

KOUMANANT-BLOAZ : 100 LUR

KOUMANANT A ENOR : 200 LUR

Kas an arc'hant da : L. NEMO, 110, B^e de Metz
RENNES C. C. 12110 Rennes